

Na osnovu članova 40. i 51. Statuta Javnog preduzeća RADIO-TELEVIZIJA ZENICA d.o.o. Zenica, direktor Uprave podnosi Nadzornom odboru Javnog preduzeća RADIO-TELEVIZIJA ZENICA sljedeći

IZVJEŠTAJ

O RADU I POSLOVANJU

ZA 2022. GODINU

SADRŽAJ

UVOD	3
OSNOVNI PODACI	3
OSTVARIVANJE JAVNE FUNKCIJE I REALIZACIJA POSLOVA U 2022. GODINI...	3
BILJEŠKE UZ IZVJEŠTAJ O FINANSIJSKOM POSLOVANJU.....	4
PRIHODI	6
RASHODI	7
BILANS STANJA I USPJEHA	9
BROJ ZAPOSLENIH	11
PROIZVODNJA, PRIJENOS I EMITOVANJE PROGRAMA	12
O RADU DIREKTORA	16
O RADU NADZORNOG ODBORA	17
TROGODIŠNJI PLAN POSLOVANJA	19
PLAN ZA 2023.	22
PLAN NABAVKI	24
IZVOD IZ IZVJEŠTAJA REVIZORA	26
ZAKLJUČAK	30

UVOD

JAVNO PREDUZEĆE RADIO-TELEVIZIJA ZENICA osnovano je 23. maja 1995. godine. Glavni cilj osnivanja je ostvarivanje prava stanovnika tada Općine, danas Grada Zenica na potpuno, pravovremeno, istinito i objektivno informisanje, te zadovoljavanje ostalih kulturnih i obrazovnih potreba. U sastav ovog javnog preduzeća ušlo je i dotadašnje preduzeće „Radio-Zenica“ d.d. Zenica.

Osnovna djelatnost JP RTV ZENICA je proizvodnja, prijenos i emitovanje radijskog i televizijskog programa, namijenjenog javnosti.

Radio i Televizija Zenica imaju status javnih stanica, što je regulisano i važećim dozvolama, a što konkretno podrazumijeva da moraju ispunjavati posebne programske zahtjeve, koje propisuje Regulatorna agencija za komunikacije Bosne i Hercegovine. Pored posebnih programskih zahtjeva, RTV ZENICA, kao javna stanica, podliježe i posebnim propisima i ograničenjima za emitovanje reklamnih sadržaja i plaćenog oglašavanja.

Radio Zenica je krajem 2021. godine dobila novu desetogodišnju dozvolu za rad, dok je Televizija Zenica dobila kratkoročnu dozvolu, na jednu godinu, zaključno sa 31.12.2023. godine, jer je tokom 2021. godine počeo proces digitalizacije radiodifuzne mreže u Bosni i Hercegovini i neophodan je prelazak svih televizijskih stanica na digitalnu zemaljsku radiodifuziju.

OSNOVNI PODACI

Vijeće Općine Zenica je, na svojoj sjednici održanoj dana 23. maja 1995. godine donijelo Odluku o osnivanju JAVNOG PREDUZEĆA RADIO-TELEVIZIJA ZENICA (u daljem tekstu: RTV ZENICA) broj: 01-30-35/95. Ovo javno preduzeće upisano je kod registra Višeg suda u Zenici dana 26.09.1995. godine, Rješenjem o upisu broj U/I-4697 kao Javno preduzeće „RTV ZENICA“ Zenica, za proizvodnju, prenos i emitovanje programa namijenjenog javnosti sa potpunom odgovornošću, sa sjedištem u Zenici u ulici Muhameda Seida Serdarevića broj 23.

U organizacionom smislu, JAVNO PREDUZEĆE RADIO-TELEVIZIJA ZENICA registrovano je kao društvo sa ograničenom odgovornošću, sa 67,5 odsto državnog i 32,5 odsto privatnog kapitala, a osnivači RTV ZENICE su Općina, odnosno Grad Zenica i mali udjelničari.

Skraćeni naziv firme je RTV ZENICA, a zastupa je Nandino Škrbić, direktor i jedini član Uprave.

Nadzorni odbor čine tri člana: Haris HERCEG, Dino PAŠALIĆ i Munib ISAKOVIĆ. Predsjednik Nadzornog odbora JP RTV ZENICA je gospodin Munib ISAKOVIĆ.

Sjedište, odnosno Uprava RTV ZENICE se nalazi na adresi Bulevar Kralja Tvrtka I bb, dok je kompletan proizvodni proces programa na adresi Islambegovića put 5a, 72.000 Zenica. Poslovanje na dvije odvojene lokacije, od kojih je jedna potpuno neuslovna za obavljanje djelatnosti kojom se RTV ZENICA bavi (proizvodnja programa), pored nedostatka finansijskih sredstava za produkciju, predstavlja i najveću prepreku za razvoj ovog javnog preduzeća.

Kontakt telefoni RTV ZENICE su: 032/ 449 202; 449 203; 449 204; 449 208; 449 210 i 449 211.

E-mail-ovi: info@rtvze.ba; marketing@rtvze.ba; tvurednik@rtvze.ba i direktor@rtvze.ba.

OSTVARIVANJE JAVNE FUNKCIJE I REALIZACIJA POSLOVA U 2022. GODINI

Osnovna djelatnost JP RTV ZENICA je proizvodnja, prijenos i emitovanje radio i televizijskog programa, namijenjenog javnosti.

U 2022. godini JP RTV ZENICA je ispunila svoju osnovnu funkciju, a to je pružanje audio i audio-vizuelnih usluga i online sadržaja od javnog interesa.

Planirane programske aktivnosti započete krajem 2017. godine, vođene su i tokom 2018., te nastavljene i u 2019. godini. Nažalost, početkom 2020. godine, pojavom pandemije koronavirusa, kako u cijelom svijetu, tako i u Bosni i Hercegovini i našem Gradu, razvoj i unapređenje programskih sadržaja, odnosno realizacija poslovnih aktivnosti je poprilično otežano.

Poslovanje JP RTV ZENICA u 2020., ali i u 2021. godini, usljed vanredne situacije i problema nastalih zbog pojave pandemije, nije se moglo odvijati u potpunosti u skladu sa smjernicama za izradu Poslovnog i Finansijskog plana. U Izvještaju o radu i poslovanju, obuhvaćeni su svi podaci koji su najdirektnije utjecali na finansijski rezultat, likvidnost i imovinu Društva.

Iako je prilikom donošenja plana za 2021. i 2022. godinu posebna pažnja posvećena planiranju rashoda i prihoda, a s ciljem konačnog saniranja gubitaka nastalih u pandemijskoj, 2020. godini (kao posljedica otkazivanja stalnih ugovora o reklamama, a zbog pojave pandemije), ali i u prethodnim godinama, godina su bile izuzetno teške i prepuna izazova, ali je uprkos tome, plan dobiti višestruko nadmašen.

Aktivnosti RTV ZENICA od 2017. do 2019. godine su se ogledale kroz investicije u digitalnu proizvodnu infrastrukturu, ali smo, nažalost, protekle tri godine, 2020., 2021., ali i 2022. godine bili u potpunosti onemogućeni nastaviti ovaj trend digitalizacije, zbog poznatog razloga otežanog poslovanja usljed pandemije.

Pored činjenice da smo, tokom 2019. godine, koja je bila rekordna po svim parametrima poslovanja JP RTV ZENICA (ukupan prihod, dobit, ali i ostale programske aktivnosti), započeli proces rješavanja našeg prostornog problema i postupak adaptacije poslovnih prostorija koje trenutno koristimo, te prilagodbe istih za potrebe televizijskog studija, realizacija ovog projekta je prošle godine, također, bila u potpunosti zaustavljena, djelimično zbog finansijskih razloga, a većim dijelom zbog saznanja da prostor koji smo planirali dograditi i pretvoriti u pravi rtv dom, te konačno riješiti ovaj dugogodišnji „kamen spoticanja“ ovog javnog preduzeća, da isti nema riješene imovinsko-pravne odnose.

U programskom smislu, ovaj izvještajni period karakteriše samo održavanje postojećih programskih sadržaja na svim platformama RTV ZENICE. U programima i na sve tri platforme RTV ZENICE gledaoci su u 2022. godini, pored informativnih sadržaja, mogli da prate razne zabavno-muzičke sadržaje u HD rezoluciji. Neki od sadržaja koji su emitovani su snimci dijelova oficijelnog programa Zenica Summer Fest 2022, zatim vrhunskog Ramazanskog programa, ali i javljanje novinara – reportera sa ulica našeg Grada za potrebe programa.

Najvažnije je istaći činjenicu da smo proteklu 2022. godinu završili izuzetno uspješnim pozitivnim poslovnim rezultatom.

BILJEŠKE UZ IZVJEŠTAJ O FINANSIJSKOM POSLOVANJU

Finansijski izvještaji Društva sačinjeni su po načelu historijskog troška. Računovodstvene politike dosljedno su primjenjivane u svim periodima predstavljenim u ovim finansijskim izvještajima i u skladu su s računovodstvenim politikama korištenim u prethodnoj godini. Prihodi od pruženih usluga priznaju se u Bilansu uspjeha po stepenu dovršenosti. Stepenu dovršenosti mjeri se kao odnos troškova nastalih do datuma bilansa i planiranih ukupnih troškova iz ugovora. Prihodi od prodaje iz ostalih aktivnosti priznaju se u bilansu uspjeha, isključujući PDV, u trenutku isporuke proizvoda kupcu, ispostavljena je faktura, koju kupac nije osporio. Iznos prihoda se može pouzdano izmjeriti na osnovu fakture, ugovora ili naplaćenog iznosa. Postoji vjerovatnoća, odnosno potpuna izvjesnost da će ekonomske koristi vezane za transakciju pritjecati u Društvo. Prihodi od prodaje ulaganja (stalnih sredstava) utvrđeni su kao razlika između postignute prodajne cijene ulaganja i knjigovodstvene vrijednosti ulaganja (stalnog sredstva). Prihodi od kamata su priznati na osnovu naplaćenog prihoda koji se odnosi na kamate. Rashodi su priznati u Bilansu uspjeha na osnovu direktne povezanosti između nastalih troškova i specifičnih stavki prihoda, po principu sučeljavanja prihoda i rashoda. Naprimjer, sve vrste troškova, odnosno rashoda, koji čine troškove nabavke prodane robe (nabavna vrijednost prodane robe), priznati su istodobno kao i prihodi od prodaje te robe. Priznavanje rashoda izvršeno je istodobno i sa priznavanjem povećanja obaveza ili smanjenja sredstava, bez obzira da li su plaćene ili ne. Prema tome, svi rashodi koji su nastali

i koji se odnose na obračunski period, priznati su u Bilansu uspjeha, bez obzira da li se istovremeno radi i o odlivu gotovine ili ekvivalenta gotovine ili ne. Kamate pozajmljenih sredstava su priznate u iznosu koji se odnosi na iznos uplaćenih sredstava po osnovu kamata. Nematerijalna imovina se početno vodi po trošku ulaganja, te naknadno po trošku ulaganja umanjenom za akumuliranu amortizaciju i gubitke od umanjenja vrijednosti. Amortizacija se obračunava linearnom metodom tokom procijenjenog korisnog vijeka trajanja nematerijalne imovine. Materijalna imovina (nekretnine, postrojenja i oprema) iskazana je po nabavnoj vrijednosti umanjenoj za akumuliranu amortizaciju i umanjenja vrijednosti. Amortizacija se obračunava linearnom metodom tokom procijenjenog korisnog vijeka trajanja. Nabavna vrijednost/cijena koštanja zaliha obuhvata sve troškove nabave, troškove proizvodnje i druge troškove koji su nastali u procesu dovođenja zaliha na sadašnju lokaciju i u sadašnje stanje. Zalihe sirovina i materijale, rezervnih dijelova, sitnog inventara, ambalaže i auto-guma vrednuju se po trošku (nabavnoj vrijednosti). Zalihe gotovih proizvoda u skladištu vrednuju se po cijeni koštanja. Zalihe trgovačke robe u veleprodaji vrednuju se po nabavnoj vrijednosti. Zalihe gotovih proizvoda i trgovačke robe u maloprodaji vrednuju se po prodanoj vrijednosti (bruto vrijednost), a trošak i neto vrijednost u Bilansu stanja ovih zaliha određuje se smanjenjem prodajne vrijednosti za odgovarajući postotak poreza i postotak bruto marže.

Svi finansijski izvještaji JP RTV ZENICA d.o.o. Zenica, za obračunski period 01.01.2022.-31.12.2022. godine, u potpunosti su urađeni u skladu sa Zakon o računovodstvu i reviziji Federacije BiH, uz primjenu MRS i MSFI – Međunarodnih računovodstvenih standarda i Međunarodnih standarda finansijskog izvještavanja.

Finansijski izvještaj sačinjen je u cilju sagledavanja rezultata poslovanja ovog javnog preduzeća, kao i realizacije Finansijskog plana za 2022. godinu. Podaci u tabelama pripremljeni su i sistematizovani na bazi prihoda i rashoda za 2022. godinu, finansijske dokumentacije koja prezentira registrovane promjene u poslovanju za izvještajni period, pravilnika i zakonskih propisa i normativnih akata koji regulišu djelatnost rada medijskih kuća, MSFI-ovima, kao i ostale prateće dokumentacije u skladu sa Međunarodnim računovodstvenim standardima, koji regulišu ovu materiju.

Ostvareni ukupan prihod u periodu 01.01.2022. do 31.12.2022. godine iznosi: 1.397.952,00 KM, što je u odnosu na isti period prethodne godine, POVEĆANJE za 121.351,00 KM ili 9,51 %. U obračunskom periodu 2022. godine, POSLOVNI PRIHODI iznose 506.433,00 KM, što je 36,2 % ukupnog prihoda. Najveći prihodi u 2020. godini u strukturi prihoda činili su: Ostali prihodi i dobiti (AOP 251), u iznosu od 891.519,00 KM, što je 63,8 % ukupnog prihoda. Ostvarena dobit u obračunskom periodu iznosi 28.080,00 KM.

Iako je ostvaren pozitivan finansijski rezultat u 2022. godini, prioriteti i u ovoj, 2023. poslovnoj godini, ostaju održavanje tekuće likvidnosti, posebno imajući u vidu nepredvidljivost okolnosti u kojima JP RTV ZENICA posluje, te stanje makroekonomskih pokazatelja i budžetskih finansija koje bi, a s obzirom na opredjeljenje i prefiks „javno“, trebale biti dominantan izvor finansiranja ovog preduzeća.

Ostvareni ukupni rashodi u obračunskom periodu, od 01.01.2022. do 31.12.2022. godine iznose 1.369.872,00 KM, što je u odnosu na isti period prethodne godine POVEĆANJE za 98.593,00 KM ili 7.8%. U ovom obračunskom periodu, POSLOVNI RASHODI iznose 1.271.462,00 KM, što je 92,8 % ukupnih rashoda. U odnosu na isti period prethodne godine, ovi rashodi imaju POVEĆANJE za 6.578,00 KM ili 0.5%.

U navedenom obračunskom periodu, najveći rashodi su „troškovi plaća i ostalih ličnih primanja“, u iznosu od 784.618,00 KM, što je 57,3 % ukupnih rashoda. U odnosu na isti period prethodne godine, ovaj rashod ima POVEĆANJE za 49.425,00 KM ili 6,7 %. Na drugom mjestu po veličini rashoda je „amortizacija“, u iznosu od 229.635,00 KM, što je 16,8 % ukupnih rashoda i u odnosu na isti period prethodne godine, ovaj rashod ima POVEĆANJE za 119.085,00 KM ili 107,7 %, dok su na trećem mjestu po veličini su rashoda „troškovi primljenih usluga“ u iznosu od 164.436,00 KM, što je 12 % ukupnih rashoda, a u odnosu na isti period prethodne godine, ovaj rashod ima SMANJENJE za 179.296,00 KM ili 52,2 %.

PRIHODI

RB	OPIS	Ostvarenje JANUAR - DECEMBAR 2020. godine	Ostvarenje JANUAR - DECEMBAR 2021. godine	Ostvarenje JANUAR - DECEMBAR 2022. godine	Procenat pada/rasta prihoda= ((4-3)/3)*100 2021. u odnosu na 2020. godinu	Procenat pada/rasta prihoda= ((5-4)/4)*100 2022. u odnosu na 2021. godinu	% u prihodu 2022.
1	2	3	4	5	6	7	8
	A. PRIHODI						
1	Prihod od godišnjih ugovora	48.090	64.249	66.230	33,60	3,08	4,74
2	Prihod od raznih obavještenja i reklama, razni projekti	258.340	316.647	245.821	22,57	-22,37	17,58
3	Prihod od čestitki	15.078	16.944	11.210	12,38	-33,84	0,80
4	Prihod od usluga trećim licima – prefakturisanje market.agencije	15.953	27.238	12.471	70,74	-54,21	0,89
5	Prihod od produkcije- spotovi, džinglovi i sl.	49.737	50.746	51.386	2,03	1,26	3,68
6	Prihodi od političkog oglašavanja	16.575	0	9.063	-100,00	100,00	0,65
7	Prihod od nemarketingških usluga	0	4.345	4.216	100,00	-2,97	0,30
8	Prihodi od koprodukciskih ugovora	14.750	24.950	26.380	69,15	5,73	1,89
9	Prihodi od vjerskih programa	27.341	19.650	39.180	-28,13	99,39	2,80
10	Prihodi od IOM; ZSF; Ze-Ad vlastiti	94.180	56.720	44.191	-39,77	-22,09	3,16
I	PRIHODI OD USLUGA VLASTITE DJELATNOSTI	540.044	581.489	510.148	7,67	-12,27	36,49
11	Prihodi od finansiranja Grada Zenica u novčanom obliku	340.000	340.000	380.000	0,00	11,76	27,18
12	Prihodi od finansiranja ostalo – festivali i sl.	50.000	281.500	396.000	463,00	40,67	28,33
13	Prihodi od finansiranja za razne projekte	12.000	7.000	4.000	-41,67	-42,86	0,29
14	Prihodi od subvencija	20.000	0	52.340	-100,00	100,00	3,74
15	Prihodi za sanaciju štete TV studio	10.000	0	0	-100,00	0,00	0,00
II	JAVNI PRIHODI	432.000	628.500	832.340	45,49	32,43	59,54
16	Prihodi od donacija - amortizacioni dio oprema	68.203	58.195	47.455	-14,67	-18,46	3,39
17	Prihodi od ukinutih rezervisanja rezervisanja	100.000	0	0	-100,00	0,00	0,00
18	Naplaćena otpisana potraživanja	0	0	2.474	0,00	0,00	0,18
19	Prihodi od finansiranja zavoda za zapošljavanje	8.540	4.752	4.334	-44,36	-8,80	0,31
20	Prihodi – ostali poslovanja	2.570	3.665	1.201	42,61	-67,23	0,09
III	OSTALI POSLOVNI PRIHODI	179.313	66.612	55.464	-62,85	-16,74	3,97
	UKUPNI POSLOVNI PRIHOD (I+II)	1.151.357	1.276.601	1.397.952	10,88	9,51	100,00

RASHODI

RB	OPIS	Ostvarenje JANUAR - DECEMBAR 2020. godine	Ostvarenje JANUAR - DECEMBAR 2021. godine	Ostvarenje JANUAR- DECEMBAR 2022. godine	Procenat pada/rasta rashoda= ((4-3)/3)*100	Procenat pada/rasta rashoda= ((5-4)/4)*100	% u rashodu 2022.
1	2	3	4	5	6	7	8
	RASHODI						
1	Troškovi kancelarijskog i materijala za održavanje higijene prostorija, nabavna vrijednost prodane robe	5.128	3.855	7.127	-24,82	84,88	0,51
2	Troškovi električne energije	9.494	11.462	9.287	20,73	-18,98	0,66
3	Troškovi grijanja	6.644	8.094	8.309	21,82	2,66	0,59
4	Troškovi goriva	5.853	2.856	3.454	-51,20	20,94	0,25
5	Troškovi otpisa inventara	5.007	2.497	3.257	-50,13	30,44	0,23
I	MATERIJALNI TROŠKOVI	26.998	28.764	31.434	6,54	9,28	2,25
6	Troškovi neto plata	389.510	381.009	378.111	-2,18	-0,76	27,05
7	Porez na dohodak na neto plate	24.542	24.369	24.921	-0,70	2,27	1,78
8	Doprinosi na osnovicu	188.667	184.111	190.403	-2,41	3,42	13,62
9	Doprinosi iz osnovice	63.903	62.360	64.491	-2,41	3,42	4,61
II	TROŠKOVI PLATA	666.622	651.849	657.926	-2,22	0,93	47,06
10	Ostala primanja zaposlenih, topli obrok, otpremnine, prijevoz i sl.	91.203	72.619	113.611	-20,38	56,45	8,13
11	Troškovi po osnovu tužbi radnika za ranije periode	109.763	0	0	-100,00	0,00	0,00
III	TROŠKOVI OSTALIH PRIMANJA ZAPOSLENIH	200.966	72.619	113.611	-63,87	56,45	8,13
12	Troškovi NO, bruto	8.905	10.637	12.653	19,45	18,95	0,91
13	Troškovi naknada po ugovorima	1.895	119	428	-93,72	259,66	0,03
IV	TROŠKOVI OSTALIH NAKNADA FIZ. LICIMA	10.800	10.756	13.081	-0,41	21,62	0,94
	TROŠKOVI ZAPOSLENIH I NAKNADE	878.388	735.224	784.618	-16,30	6,72	56,13
14	Troškovi održavanja i servisiranja	7.514	5.233	11.498	-30,36	119,72	0,82
15	Troškovi zakupa	2.130	240	14.231	-88,73	5.829,58	1,02
16	Troškovi zakupa ostalo	3.500	0	160	-100,00	100,00	0,01
17	Advokatske usluge, notarske, knjigovodstvene	20.582	7.493	18.768	-63,59	150,47	1,34

18	Agencijske usluge i posredovanje	1.542	835	1.815	-45,85	117,37	0,13
19	Komunalne i slične usluge	2.215	1.635	2.507	-26,19	53,33	0,18
20	Troškovi reprezentacije	150	909	928	506,00	2,09	0,07
21	Smještaj učesnika u manif. i ugost. usluge partnerima	424	3.214	4.916	658,02	52,96	0,35
22	Osiguranje opreme i registracije auta	4.734	3.801	4.848	-19,71	27,55	0,35
23	Troškovi platnog prometa	3.507	3.712	3.825	5,85	3,04	0,27
24	PTT, Telefonske, Telemach i slično	15.591	14.922	17.756	-4,29	18,99	1,27
25	KN, vatrogastvo, i slične takse	7.062	7.413	7.495	4,97	1,11	0,54
26	Naknada za CRA dozvole	8.655	9.010	9.317	4,10	3,41	0,67
27	Naknade za autorska prava AMUS, AIS, FONOGRAM	1.537	3.247	14.829	111,26	356,70	1,06
28	Troškovi otkupa programa	0	30.000	0	100,00	-100,00	0,00
29	Troškovi koprodukcije	21.262	271.227	46.847	1175,64	-82,73	3,35
30	Zavisni troškovi koprodukcije	0	0	56.555	0,00	0,00	4,05
31	Troškovi članarina, razni doprinosi i slično	1.205	1.839	1.187	52,61	-35,45	0,08
32	Troškovi amortizacije	133.222	110.550	229.635	-17,02	107,72	16,43
33	Troškovi štampe, kopiranje i uvezraznih materijala	1.779	945	16.537	-46,88	1.649,95	1,18
34	Zaštitna oprema COVID 19 viziri, maske, rukavice	2.970	1.216	503	-59,06	-58,63	0,04
35	Dezinfekciona sredstva Covid 19	2.450	2.205	409	-10,00	-81,45	0,03
36	Materijal za projekat IOM	4.400	16.500	0	275,00	-100,00	0,00
37	Ostali troškovi poslovanja	1.409	1.409	2.650	0,00	88,08	0,19
38	Troškovi rezervisanja	0	0	63.000	0,00	100,00	4,51
39	Troškovi seminara	718	1.057	1.780	47,21	68,40	0,13
40	Troškovi kamata, najmovi, tužbe i ostale kamate	34.037	6.395	9.174	-81,21	43,46	0,66
41	Otpisi potraživanja i slično	2.910	2.284	12.650	-21,51	453,85	0,90
V	SVEGA RAZNI TROŠKOVI POSLOVANJA	285.505	507.291	553.820	77,68	9,17	39,62
	UKUPNI POSLOVNI RASHODI	1.190.891	1.271.279	1.369.872	6,75	7,76	100,00
	UKUPNI POSLOVNI PRIHODI	1.151.357	1.276.601	1.397.952	10,88	9,51	100,00
	POSLOVNI REZULTAT	-39.534	5.322	28.080	527,63	-3,32	100,00

BILANS STANJA I USPJEHA

DUGOROČNA IMOVINA

Nabavna vrijednost dugoročne imovine na dan 31.12.2022. godine iznosi: 2.178.179,00 KM, ispravka vrijednosti je 1.355.288,00 KM, što znači da je ova imovina amortizovana (otpisana) sa 62,2%, odnosno NETO sadašnja vrijednost iznosi: 822.891,00 KM. Amortizacija za obračunski period 2022. godine iznosi: 229.635,00 KM. Najveća NETO sadašnja vrijednost dugoročne imovine je na Koncesije, patente, licence i druga prava, u iznosu od 616.333,00 KM, što je 75,3 % ukupne dugoročne imovine. U odnosu na stanje početkom godine, ova sredstva imaju POVEĆANJE za 139.336,00 KM ili 75,3 %.

KRATKOROČNA (OBRTNA) IMOVINA

Tekuća (obrtna) sredstva na dan 31.12.2022. godine iznose: 101.240,00 KM, što je u odnosu na stanje 01.01.2022. godine POVEĆANJE za 3.008,00 KM ili 3,1%. Prosječno korištena tekuća sredstva iznose 99.736,00 KM.

ZALIHE

Na dan 31.12.2022. godine nije bilo zaliha.

KRATKOROČNA POTRAŽIVANJA I PLASMANI



Kratkoročna potraživanja i plasmani na dan 31.12.2022. godine iznose: 96.572,00 KM, što je u odnosu na stanje početkom godine, POVEĆANJE za 1.524,00 KM ili 1,6 %.

Najveća potraživanja i plasmani su na poziciji Kupci u zemlji, u iznosu od 69.882,00 KM. U odnosu na stanje početkom godine, ova potraživanja imaju SMANJENJE za 10.394,00 KM ili 12,9 %.

Na dan 31.12.2022. godine nije bilo sumljivih i spornih kratkoročnih potraživanja.

GOTOVINA I EKVIVALENTI GOTOVINE

Iskazani iznos gotovine i ekvivalenta gotovine u Bilansu stanja na dan 31.12.2022. godine u iznosu 19.734,00 KM je SMANJENJE za 40.307,00 KM ili 67,1 %.





KAPITAL

Na dan 31.12.2022. godine, Društvo je kapitalom (vlastitim sredstvima) finansiralo 37,9% raspoložive aktive. Poželjno je da ovaj pokazatelj nije manji od 50 %. Vlasnički kapital iznosi 364.930,00 KM, na poziciji „udjeli članova društva sa ograničenom odgovornošću“. Druga po veličini stavka u kapitalu nalazi se na poziciji „Dobit tekućeg perioda“, u iznosu od 32.761,00 KM. U odnosu na stanje početkom godine, ova pozicija ima POVEĆANJE za 27.439 KM ili 515,6 %.

OBAVEZE (ZADUŽENOST)

Obaveze Društva (zaduženost) na dan 31.12.2022. godine iznose: 586.283,00 KM, što je u odnosu na stanje početkom godine POVEĆANJE za 9.365 KM ili 1,6 %. Na dan 31.12.2022. godine, Društvo je obavezama (tuđim sredstvima) finansiralo 62,1 % raspoložive aktive. Poželjno je da ovaj pokazatelj nije veći od 50 %.

Najveće obaveze evidentirane su na poziciji „Dugoročni odgođeni prihod“, u iznosu od 197.957,00 KM. U odnosu na stanje početkom godine, ove obaveze imaju SMANJENJE za 57.523,00 KM ili 22,5 %. Na drugom mjestu po veličini su obaveze iskazane na poziciji „Kratkoročne ostale obaveze, uključujući i razgraničenja“, u iznosu od: 166.136,00 KM. U odnosu na stanje početkom godine, ove obaveze imaju POVEĆANJE za 13.256,00 KM ili 8,7 %. Na trećem mjestu su obaveze evidentirane na poziciji „Obaveze prema dobavljačima“, u iznosu od: 79.618,00 KM. U odnosu na stanje početkom godine, ove obaveze imaju SMANJENJE za 27.494,00 KM ili 25,7 %.



PREGLED STANJA KONTA DOBITI I GUBITKA OD 2012. GODINE DO 31.12.2022. GODINE

GODINA	DOBIT	GUBITAK	STANJE (+ DOBIT) (- GUBITAK)
2012.		63.475	- 63.475
2013.	4.844		-58.631
2014.	2.091		-56.540
2015.		2.961	-59.501
2016.	15.597		-43.904
2017.	3.332		-40.572
2018.	2.619		-37.953
Gubici najmovi MSFI 16		6.587	-44.540
2019.	33.732		-10.808
2020.		44.662	-55.470
2021.	5.322		-50.148
2022.	28.080		-22.068

Usljed revalorizacije, odnosno naknadnog mjerenja vrijednosti opreme i sredstava, ostvarena je direktna dobit u iznosu od 4.681,00 KM, dok je istovremena ostvaren gubitak u kapitalu u iznosu od 8.682,00 KM i konačni trenutni gubitak, zaključno sa 31.12.2022. godine, uključujući ove kapitalne gubitke i dobiti, iznosi 26.069,00 KM.

BROJ ZAPOSLENIH

Prosječan broj zaposlenih u JP RTV ZENICA d.o.o. Zenica, u periodu od 01.01.2022. do 31.12.2022. godine, sa uporednim pokazateljima za prethodne dvije godine.

Br.	Mjesec	Na neodređeno vrijeme			Pripravnici			Ukupno		
		2020.	2021.	2022.	2020.	2021.	2022.	2020.	2021.	2022.
1.	Januar	37	34	33	6	0	1	43	34	34
2.	Februar	37	34	33	5	0	1	42	34	34
3.	Mart	35	34	33	5	0	1	40	34	34
4.	April	35	35	33	5	1	-	40	36	33
5.	Maj	34	35	32	1	1	-	35	36	32
6.	Jun	34	34	32	1	1	-	35	35	32
7.	Jul	34	33	32	0	1	1	34	34	33
8.	August	34	33	32	0	1	2	34	34	34
9.	Septembar	34	33	32	0	1	2	34	34	34
10.	Oktobar	34	33	32	0	1	2	34	34	34
11.	Novembar	34	33	32	0	1	1	34	34	33
12.	Decembar	34	33	32	0	1	1	34	34	33
	PROSJEK	35	33	32	4	1	1	37	34	33

Prema podacima Organizacione jedinice za administrativno tehničku podršku u radu Uprave JP RTV ZENICA, broj zaposlenih na 31.12.2022. godine 32, te direktor, zaposlen na mandatni period od četiri godine, kroz menadžerski ugovor (2021.-2025.)

Poslovna 2022. godina, sa svojim specifičnostima, dovela je u prvi plan važnost kvalitetnog, stručnog i osposobljenog novinarskog i tehničkog kadra, koji godinama nedostaje u JP RTV ZENICA. Nažalost, tokom protekle godine, nismo uspjeli realizovati planirane edukacije, usavršavanja i osposobljavanje naših kadrova, a posebno sa akcentom na korištenje modernih tehnologija, ali smo krajem godine, tačnije krajem novembra mjeseca 2022. godine, uspjeli sprovesti nove pravilnike o radu, sa priložima – Pravilnik o radu JP RTV ZENICA; Pravilnik o unutrašnjoj organizaciji i sistematizaciji radnih mjesta sa analitičkom procjenom radnih mjesta i Pravilnik o plaćama, naknadama plaća i drugim ličnim primanjima radnika JP RTV ZENICA.

Novim rasporedom radnika, koji je uslijedio nakon višemjesečnih pregovora sa Sindikatom radnika RTVZ iz Zenice, donio je pravedniji raspored radnih mjesta, s obzirom na to da je prethodni raspored imao mnogo više rukovodećih radnih mjesta, a plaće nižerangiranih zaposlenika su bile dosta manje u odnosu na višerangirane. Aktuelni pravilnici – unutrašnja organizacija rada i sistematizacija radnih mjesta je, prema zajedničkom zaključku većine zaposlenih, Sindikata radnika RTV Z i Uprave Društva, pravednija.

Na bazi sati rada tokom 2022. godine, prosječan broj zaposlenih je 25, što znači da je tokom cijele 2022. godine mjesečno, u prosjeku, nedostajalo sedam ili više radnika, ako se od ukupnog broja zaposlenih izuzme pripravnica.

Ogroman problem u poslovanju ovog Društva prave upravo odsustva sa posla po raznim osnovama. Tako smo, tokom 2022. godine, od ukupno 261 radnog dana, na bolovanja, godišnje odmore i odustva za upražnjavanje tradicijskih odnosno vjerskih potreba, isplatili ukupno 87.103,00 KM KM, od čega je za naknadu za bolovanje izdvojeno 50.154,00 KM na teret Društva.

Kad je u pitanju kvalifikaciona struktura, od ukupnog broja zaposlenika na dan 31.12.2022. godine, samo njih sedam je sa visokom stručnom spremom, jedno sa višom stručnom spremom, dvoje visokokvalifikovanih, te 20 sa srednjom stručnom spremom, odnosno tri kvalifikovana radnika.

Ako govorimo o nacionalnoj strukturi zaposlenih, od ukupnog broja zaposlenih na dan 31.12.2022. godine, u JP RTV ZENICA radilo je 27 Bošnjaka, jedan Hrvat, troje Srba i dvoje ostalih.

Prosjek starosti zaposlenika JP RTV ZENICA je 50+ godina. Konkretno, na posljednji dan prošle, 2022. godine, JP RTV ZENICA je imala pet zaposlenika u dobi preko 61 godinu starosti, zatim, 10 zaposlenika u dobi između 51 i 60 godina, 14 zaposlenika starosti između 41 i 50 godina, te četiri zaposlenika starosti između 31 i 40 godina starosti.

PROIZVODNJA, PRIJENOS I EMITOVANJE PROGRAMA

UKRATKO O ORGANIZACIONOJ JEDINICI

Organizaciona jedinica za proizvodnju programa, kako se prema aktuelnom Pravilniku o unutrašnjoj organizaciji i sistematizaciji radnih mjesta sa analitičkom procjenom radnih mjesta naziva ova jedinica nema u svojoj strukturi nikakve hijerarhije. Na čelu ove organizacione jedinice je Glavni i odgovorni urednik (GLODUR), radno mjesto koje rukovodi kompletnom organizacionom jedinicom. Ovo radno mjesto, do popunjavanja adekvatnim kadrom, koji će biti stručno osposobljen, spreman i voljan da kvalitativno i kvantitativno programski obogati sadržaje koje emitujemo na sve tri medijske platforme, kao vršilac dužnosti će obavljati direktor Društva.

Ova organizaciona jedinica raspolaže sa ukupno 25 uposlenika i to: osam (8) novinara, pet (5) reportera, tri (3) A-V tehničara, tri (3) snimatelja, jednog (1) operatora, dva (2) arhivara, jednog (1) tehničara, jednog (1) elektrotehničara za sistem tv prijenosa i jednog (1) montera radio-televizijske elektronike. Mjesto šefa tehnike i glavnog i odgovornog urednika u ovoj organizacionoj jedinici je ostalo upražnjeno do pronalaženja adekvatnog kadrovskog rješenja za ova radna mjesta.

Organizacionu jedinicu za administrativno-tehničku podršku u radu Uprave čini ukupno sedam (7) uposlenika, i to: Sekretar Društva (1), Certificirani računovođa/službenik za javne nabavke (1), Marketing planer (1), Administrator (1), Referent za prodaju malih oglasa (1), vozač (1) i čistačica (1).

Struktura, odnosno Sistematizacija radnih mjesta do 30.11.2022. godine imala je dva sektora: Sektor proizvodnje, prijenosa i emitovanja programa, na čijem čelu je bio „direktor Sektora“ sastojao se od dvije službe – Služba proizvodnje programa i Služba prijenosa i emitovanja programa.

Služba proizvodnje programa, tokom 2022. godine, raspolagala je sa ukupno 11 uposlenika, sa jednim rukovodiocem na čelu, dok je Službu prijenosa i emitovanja programa tokom protekle godine činilo je devet (9), sa jednim rukovodiocem Službe.

U toku 2022. godine u Sektoru PPEP su bile angažovane i dvije (2) zaposlenice iz Sektora zajedničkih poslova na poslovima arhiviranja i realizacije programa, te jedna (1) pripravnica angažovane na osnovu ugovora između Agencije za lokalni razvoj ZEDA.

Sektor zajedničkih poslova činilo je ukupno devet (9) zaposlenika.

Iz gore navedenih činjenica vidljivo je da je aktuelni pravilnik i raspored poslova i radnih mjesta napravio, ne samo ekonomski, kvalitetniji raspored, ukidajući bespotrebna rukovodeća mjesta, nego je i konkretnije ušao u rješavanje organizacijskih izazova u ovom kolektivu.

DOZVOLA ZA EMITOVANJE PROGRAMA

Regulatorna agencija za komunikacije Bosne i Hercegovine (RAK) obavijestila je sve javne i privatne emitere u Bosni i Hercegovini da se, zaključno sa 31.12.2021. godine, gase svi predajnici koji emituju analogni TV signal, a zbog uvođenja 5G pristupne mreže. Od 01. jula do 31. decembra 2021. godine, sukcesivno su se gasili analogni predajnici koje koriste TV stanice u BiH. Obaveza Regulatorne agencije

za komunikacije Bosne i Hercegovine, prema Zakonu o komunikacijama i ratifikovanim međunarodnim sporazumima, je međunarodna koordinacija frekventnih resursa i tehnički monitoring spektra, kao i upravljanje i nadzor nad radio-frekventnim spektrom BiH kao nacionalnim resursom, kroz koordinaciju sa regulatornim administracijama u regionu, Evropi i svijetu. RAK je dužan da, po međunarodno usaglašenoj i važećoj proceduri, uklanja štetne smetnje koje nastaju u susjednim zemljama zbog djelovanja predajnika iz Bosne i Hercegovine i ne postoji bilo kakva alternativa ovoj aktivnosti koja je obavezujuća za sva regulatorna tijela u svijetu, prema standardima i propisima Međunarodne unije za telekomunikacije (ITU). Isto se odnosi i na smetnje iz susjednih zemalja koje uzrokuju probleme na teritoriji naše države. RAK je blagovremeno informisao asocijacije/udruženja nosilaca dozvola, i obratio se pojedinačno svim nosiocima dozvola za distribuciju audiovizuelnih medijskih usluga i medijskih usluga radija, podsjetivši tako sve medije na obavezu poštivanja člana 9. stav (4) Pravila 79/2016 o dozvolama za distribuciju audiovizuelnih medijskih usluga i medijskih usluga radija („Službeni glasnik BiH”, broj 78/16). Odredbe ovog člana u praksi znače da će Agencija osigurati da svaki nosilac dozvole za TV emitovanje na zemaljskoj mreži u BiH ostvari pravo na distribuciju signala do jednog od kablovskih operatera, odnosno do distributivnog čvorišta, čime se osigurava kontinuitet emitovanja signala i programa, do trenutka kada počnu sa radom digitalni multipleksi na teritoriji Bosne i Hercegovine.

Regulatorna agencija za komunikacije Bosne i Hercegovine objavila je prvi „Javni poziv za dostavljanje zahtjeva pružalaca audiovizualnih medijskih usluga (AVM) za pristup otvorenom Multipleksu D“ – 16.12.2021. godine, u svih devet digitalnih regija za pokrivenost digitalnim televizijskim signalom (detaljan prikaz regija u nastavku Izvještaja, u dijelu „ELABORAT O MOGUĆIM PRAVCIMA RAZVOJA JP RTV ZENICA“). Zahtjev za pristup otvorenom Multipleksu D mogli su podnijeti svi pružatelji audiovizuelnih medijskih usluga kojima je RAK izdao dozvolu za televizijsko emitovanje, koje se vrši putem zemaljske radiodifuzije i dozvolu za televizijsko emitovanje koje se vrši putem drugih elektronskih komunikacijskih mreža. Rok za dostavu zahtjeva je istekao 24.12.2021. godine.

Naknada za emitovanje u svim regijama, propisana ovim javnim pozivom, za SD TV signal iznosila je 26.416,00 KM mjesečno, a za HD TV signal 65.463 KM mjesečno. Nakon ovog poziva, RAK je, kako je bilo najavljeno, trebao objaviti i javni poziv za pojedinačne regije u 2022. godini, međutim do toga nije došlo.

Interesantna regija za digitalno zemaljsko emitovanje televizijskog signala, u našem konkretnom slučaju, svakako je regija Vlačić, koja teritorijalno pokriva područje interesovanja JP RTV ZENICA i više od 700.000 potencijalnih gledalaca. Predviđena naknada za distribuciju na ovu regiju je, prema cjenovniku, 5.396,00 KM/mjesečno za SDTV kvalitet signala, odnosno 13.372 KM/mjesečno za HD TV signal.

Prateći rokove i proceduru u vezi sa istekom dozvole za radio i TV emitovanje zaključno sa 31.12.2022. godine, JP RTV ZENICA je pravovremeno podnijela zahtjev RAK-u za izdavanje nove dozvole za rad i emitovanje signala na zemaljskoj mreži za radio i televiziju. Dozvolu za televizijsko emitovanje signala sa kote Klopče i to prema tehničkoj specifikaciji koja je bila odobrena i u prethodnoj dozvoli, odnosno emitovanje analognog televizijskog signala, RTV ZENICA dobila je zaključno sa 31.12.2023. godine, odnosno dok se ne steknu uslovi za početak emitovanja digitalnog signala ili dok analogni signal ne bude ometao druge emitere u dozvoljenom području. Dozvola za emitovanje radijskog signala je odobrena za period od 10 godina, počevši od 01.01.2022. godine, zaključno sa 31.12.2031. godine, na frekvencijama 106,6 MHz, sa lokacije Lisac, izlazne snage 2 KW i na 103,0 MHz, sa lokacije Borik, izlazne snage 200 W (Maglaj).

TEHNIČKA REALIZACIJA FESTIVALA

U 2022. godini JP RTV ZENICA je ponovo bila tehnički realizator i nosilac organizacije dva festivala – ljetnog – Zenica Summer Fest i zimskog – Zenica Adventure, čiji je glavni organizator i pokrovitelj Grad Zenica, odnosno Gradska uprava.

Prijenosi uživo, snimci koncerata, festivalske reportaže i hronike, ali i direktna gostovanja estradnih i drugih zvijezda u programima i na sve tri platforme RTV ZENICA, svakako su benefit sam po sebi za ovo javno preduzeće, ali bi se, s obzirom na ogroman posao i angažman svih zaposlenih, posebno u

Organizacionoj jedinici za proizvodnju programa, koji tokom oba festivala imaju i po 16 sati dnevnog rada, definitivno trebala uraditi ozbiljna analiza po pitanju buduće organizacije i realizacije ovako velikih projekata, koji su, činjenica, ogroman „zalogaj“ za ovako malo preduzeće i kolektiv.

RADIO ZENICA

Program Radio Zenice u 2022. godini realizovan je na principima i pozitivnoj praksi iz prethodnih godina. Zadržana je programska shema iz prethodne godine, radijsko-televizijskog karaktera jutarnjeg programa, prilagođena i slušaocima i gledaocima istovremeno, u terminu od 08:00 do 14:00 sati, u okviru kojeg su emitovani sadržaji svih kategorija informativne, dijaloške, obrazovno-edukativne, vjerske, sportske i dječije emisije, ankete, telefonski razgovori, realizovana su gostovanja itd. U ovom terminu i programskom segmentu zadovoljene su i standardne obaveze televizijskog programa, koje proizilaze iz dozvole za emitovanje programa.

Zadržan je sistem rada po principu „one man show-a“, ali uz izražen problem angažovanja voditelja u studiju, s obzirom na duža odsustva voditelja po osnovu bolovanja, zatim isteka angažmana pripravnika i volontera itd.

Radio Zenica je, u godini koju obuhvata ovaj izvještajni period, obilježio 53 godine postojanja i rada. Zadržali smo programsku shemu i orijentaciju pod motom „Za sve nacije i sve generacije“, a u informativnom programu moto je ostao „Uvijek prije svih“.

Stalne emisije su: Vijesti (pet minuta prije cijelog sata, svaki dan osim nedjelje), zatim, polusatne informativne emisije „Radio Slobodna Evropa“ (RFE), „Glas Amerike“ (WOA) i „Radio Italia“, polusatne vjerske emisije „Islam u vremenu“ i „Glas žene“, te komercijalne emisije poput „Dobre vode“, a edukativni, omladinski, muzički i sportski sadržaji emitovani su svakodnevno u okviru dugih programskih sadržaja planiranih dnevnom i sedmičnom programskom shemom.

U ovoj i ovakvoj situaciji, za bilo kakav iskorak u programskom segmentu Radija Zenica, neophodno je, prvenstveno, angažovati nove kadrove, mlade i talentovane nove voditelje, uz obaveznu prethodnu audiciju, ali i nabavka nove, moderne, nedostajuće opreme za kvalitetniju realizaciju radijskog programa.

TELEVIZIJA ZENICA

Posmatrano iz ugla osnivača, ali i konzumenata naših usluga, Televizija Zenica je, i dalje, primarna i najvažnija platforma ove medijske kuće. U segmentu rada ove platforme, u Organizacionoj jedinici za proizvodnju programa zadovoljene su standardne obaveze, uz poštivanje osnovnih postulata novinarstva i funkcionisanja jednog ovakvog lokalnog medijskog servisa građana, čiji su kapaciteti i domen ograničeni. Zadržan je sistem rada po principu redakcijskog planiranja dnevnih i periodičnih obaveza i programskih sadržaja.

Televizija Zenica je, u godini koju obuhvata ovaj izvještajni period, obilježila 27 godina postojanja i rada. Zadržana je programska shema i orijentacija pod starim motom „Tu smo zbog Vas“, ali i novim „Uvijek prije svih“. Program je nastavljen s pripremom i emitovanjem iz neuslovnih prostorija koje su u proteklih dvije godine i prokišnavale, što je, velikim naporom Uprave, konačno i riješeno tokom prošle godine.

Na programskim poslovima angažovane su sve kolegice i kolege iz Organizacione jedinice za proizvodnju programa, a implementacijom novih pravilnika, odnosno nove sistematizacije radnih mjesta, prilično je smanjen i trend odsustva s posla po osnovu bolovanja.

I ovdje, kao i u programu Radija Zenice, za bilo kakav iskorak u programskom smislu, neophodno je otkloniti već poznate probleme i nedostatke po pitanju kadrova, ali i tehničke opreme, te prostornih kapaciteta.

Televizijske emisije, koje su emitovane tokom 2022. godine su: „ZenicalInfo“ u 15:00 i Centralna informativna emisija ZenicalInfo u 18:40, zatim nove emisije „Aktuelno“, „Iz mlade zjenice“ i „Mali, a veliki“, te reprize emisija „Selu u pohode“, „Zeničke priče“. Pored ovih emisija iz vlastite produkcije, u programu Televizije Zenica emitovane su i emisije drugih medijskih kuća partnera RTV ZENICA: „Glas

Amerike“, „TV Justice“, „Impuls znanja“, „Naša snaga“, „Autoshop magazin“, „Hayd u park“, „Školokrečina“, „Perspektive“, „Češljanje bajki“, „Pjesmom o Bosni“ i „Hod vijekova“, zatim serijal emisija Al Jazeera televizije, serijal emisija „Afera“ u produkciji Žurnal tv, emisije sa Semirom Osmanagićem, ali i filmovi koje smo nabavili od svjetske produkcijske kuće BLITZ, sa kojima smo ostvarili saradnju.

WEB PORTAL „www.zenicainfo.ba“

S obzirom na činjenicu da internet postaje sve prisutniji u svakodnevnom životu građana, postaje najčešći kanal za slanje i prijem informacija, nameće se i diktira nove pristupe i načine rada, pa i u smislu bržeg i dinamičnijeg plasiranja informacija, lakše dostupnosti sadržajima, izazovima modernog doba, zahtjevima čitalaca, gledalaca i slušalaca, Uprava RTV ZENICE se, još 2018. godine, strateški opredijelila da napravi preokret u radu i plasiranju informacija u odnosu na dosadašnju praksu, u smislu usklađenosti sa novim tehnologijama i trendovima. Strateškim planom, koji ove godine mora biti revidiran i koji je već, svakako, WEB PLATFORMI dao prioritet u odnosu na Radio i Televiziju, predviđeno je da WEB PORTAL ovog javnog preduzeća bude osnova za emitovanje televizijskih i radijskih sadržaja odnosno da vijest koja bude objavljena na online platformi, kao takva, ima mogućnost oblikovanja i formulisanja za objave na Radiju i Televiziju, koje su, već po defaultu, višestruko sporije medijske platforme, samim tim što zahtijevaju ogromne predradnje i pripreme sadržaja prije same objave.

Prema zvaničnim statističkim podacima Google Analytics-a, autorizovanog i jednog od najkredibilnijih servisa za praćenje rada na internetu, „www.zenicainfo.ba“, portal JP RTV ZENICA i dalje je jedan od najutjecajnijih i najčitanijih u regiji Srednje Bosne, pogotovo u Zenici i Zeničko-dobojskom kantonu. Konstantan rast pratilaca je usporen, što vjerovatno leži u činjenici i opredijeljenju ovog lokalnog medija da preferira informacije i objave vezane za Zenicu, pa je ovaj portal manje atraktivan i interesantan čitaocima kojima sfera interesovanja nisu zbivanja isključivo u našem gradu. To je i donekle i opravdano, jer je RTV ZENICA i osnovana kao gradski servis, i svakako je prioritet informisanje građana Zenice.

Kada je u pitanju zvanični nalog – account na društvenoj mreži Facebook, „zenicainfo.ba“, stranicu prati oko 56 hiljada korisnika, sa stalnom tendencijom rasta. Prema analitici Facebook-a, u posljednjih mjesec dana 2022. godine doseg objava bio je preko 400 hiljada korisnika, sa skoro 180 hiljada zabilježenih angažmana korisnika/pratitelja.

UNAPREĐENJE PROGRAMA

Potreba za unapređenjem programa je konstantna, bez obzira od koga takvi zahtjevi dolazili. Međutim, svaka priča, plan ili pokušaj unapređenja i kreiranja kvalitetnijih programskih sadržaja od dosadašnjih, ovisi isključivo od nekoliko ključnih faktora. To su, prije svih, kadrovski resursi, tehnička opremljenost, adekvatniji prostorni kapaciteti i finansijska podrška, prije svega našeg Osnivača. Kad su u pitanju ljudski potencijali, sve nas je manje, starosna dob većine uposlenika je 50+, što itekako negativno utječe na osmišljavanje, kreiranje i realizaciju kvalitetnijih programskih sadržaja.

Već je nekoliko puta istaknuto da Televizija zahtijeva nova lica, nove ideje, kreativnost, timski rad, angažman i „van radnog vremena“, a kod nas je sve to izražen problem i nedostatak. Dodatno je usložen činjenicom da su učestala odsustva i ovo malo uposlenika što imamo, po raznim osnovama, a pandemija koronavirusa je sve dodatno zakomplikovala i usložnila.

U protekle četiri godine imali smo povremeni angažman mladih osoba, dio ih je odrađivao pripravnčki staž, a dio bio uposlen po posebnim programima resornih ministarstava na godinu dana. Međutim, sve što je s njima postignuto, bilo je na kratkoročnom novou. Bili su, naučili, radili i otišli. Trenutno nam je izražena potreba za angažman najmanje troje voditelja – prezentera i nekoliko novinara, a posebno i nekolicine ljudi iz Tehnike, ukoliko želimo, a želimo, uvesti određene programske novine, kao sveukupna osvježenja u ovom malom kolektivu.

Tokom mjeseca marta 2023. godine Federalni zavod za zapošljavanje je objavio nekoliko projekata i programa za sufinansiranje zapošljavanja pripravnika i/ili drugih mjera sufinansiranja zapošljavanja

zaposlenika kroz različite programe, koji smo iskoristili i uspjeli, po sporazumu sa Federalnim zavodom za zapošljavanje, zaposliti nekoliko novih lica.

S tim u vezi, odmah smo pokrenuli, ponovo, produkciju i emitovanje popularnog serijala naše vlastite emisije Popodne s Vama, koju smo prestali emitovati pojavom koronavirusa, a zbog nemogućnosti ispunjavanja minimalnih higijensko-epidemioloških mjera. Iako se situacija po pitanju koronavirusa stabilizirala i stvorile su se pretpostavke da ponovo krenemo sa emitovanjem ove emisije, proteklih godinu i više nismo imali adekvatno kadrovska rješenje.

TROGODIŠNJI PLAN PROGRAMSKIH AKTIVNOSTI

Strateški pravci i specifični ciljevi iz Strateškog plana preduzeća taksativno su definisali šta je bilo potrebno i neophodno uraditi, a s obzirom na to da većina ciljeva iz ovog Plana nije realizovana iz više otežavajućih faktora, u narednom periodu potrebno je uraditi reviziju tog Strateškog plana i prilagoditi ga trenutnom stanju u preduzeću, redefinisati specifične ciljeve za 2023., 2024. i 2025. godinu, a posebno se fokusirati na konkretan plan aktivnosti za tekuću 2023. godinu, uvažavajući preporuke i vizije osnivača (Gradskog vijeća i Gradonačelnika) u kojem smjeru ovo preduzeće treba da ide u budućnosti.

Trogodišnji plan programskih aktivnosti uslovljen je i limitiran raspoloživim kadrovima, tehničkom opremom, prostornim (ne)mogućnostima...

O RADU DIREKTORA

Nakon vanserijskih i vrhunskih uspjeha i rezultata u 2019. godini, koja je bila najuspješnija godina po svim parametrima od osnivanja ovog Preduzeća, uslijedila je 2020., takozvana pandemijska godina, možda čak najteža godina od osnivanja JP RTV ZENICA. Protekle, 2021. i 2022. godina su, svakako, bile godina izazova, uspona i padova, ispravki poslovanja iz pandemijske godine i na kraju, što i jeste najbitnije u poslovanju jednog preduzeća, završene su pozitivnim finansijskim rezultatom.

Tokom 2021. godine, velikim naporima Uprave i Službe marketinga, uspješno je vraćeno nekoliko, pandemijom izgubljenih, stalnih klijenata, koji su ponovo počeli koristiti usluge ove medijske kuće, a taj trend se nastavio i u 2022. godini, pa smo tako, zahvaljujući ogromnom angažmanu i naravno velikom zagaljanju, uspjeli ponovo napraviti veliki iskorak u smislu ukupnog prihoda, koji je nadmašio čak i prihod iz 2019. godine. Prošle, 2022. godine, ostvaren je ukupan prihod u iznosu od 1.397.952,00 KM, odnosno dobit u iznosu od 28.080,00 KM.

Poslovna politika RTV ZENICA u 2022. godini, kao i u godini ranije, usmjerena je na smanjenje ukupnih rashoda i smanjenje obaveza iz ranijih godina, te je, tako gledajući, ukupno poslovanje Radio – televizije Zenica u 2022. godini bilo uspješno.

Nakon opsežne analize poslovanja, iskazane u ovom Izvještaju, može se izvesti zaključak o uspješnom poslovanju RTV ZENICA u gotovo svim segmentima poslovanja. Uspješnost u poslovanju RTV ZENICA ogleda se, prije svega, u realizaciji njenog glavnog zadatka – proizvodnji, nabavci i emitovanju programa, koji je uspješno obavljen.

Dugogodišnji problem, praktično od osnivanja ovog javnog preduzeća, je neuslovnost prostorija, odnosno poslovanje na dvije lokacije, u neadekvatnim i neuslovnim i potpuno nenamjenskim prostorijama za obavljanje osnovne djelatnosti što ujedno i otežava i poskupljuje rad. Na ovom problemu već smo imali spremna rješenja, međutim, još nikad nismo u potpunosti realizovali ovaj, od iznimne važnosti za funkcionisanje ovog javnog preduzeća, projekat.

Pored ovog, još jedan, ne manje bitan problem, svakako je i rad sa improvizovanom tehnikom, koja je gotovo ručni rad i sve, samo ne profesionalna broadcast oprema. Pomoću modifikovanih linkova i antena, mi posljednjih nekoliko godina, srećom veoma uspješno, radimo sve direktne televizijske prijenose.

Osvrnuo bih se, ovom prilikom, na aktivnosti i realizovane projekte JP RTV ZENICA u proteklih nekoliko godina, čija je realizacija, pojavom pandemije, onemogućena i zaustavljena, ali i posebno na planirane aktivnosti, programe i projekte u ovoj, 2023., ali i godinama koje slijede.

U skladu sa planiranim programskim ciljevima, u narednom periodu, intenzivno ćemo raditi na:

- podizanju kvaliteta i reafirmaciji programa, imajući u vidu istinito, blagovremeno i objektivno informisanje o svim lokalnim događajima;
- stvaranju i širenju obima proizvodnje vlastitog radijskog i televizijskog programa i produkcije;
- obezbjeđenju većeg dijela sredstava van redovnih i ustaljenih tokova prihoda, te
- zapošljavanju i edukaciji novih mladih kadrova, gdje ćemo posebno voditi računa o osjetljivim kategorijama društva.

Kad su u pitanju konkretni zadaci i ciljevi koje ćemo realizovati tokom ove godine, posebno bih izdvojio sljedeće:

- Naš online medij, odnosno web portal – ZENICAINFO.BA, kao budućnost u radu medija, bit će okosnica razvoja i glavni izvor vijesti za naše druge dvije platforme – Radio i Televiziju;
- Osvježiti ćemo program Radio Zenice, uvesti nove sadržaje, emisije;
- Napraviti ćemo moderniji, sadržajni i kvalitetniji jutarnji program radija, ali i, koliko uslovi i finansijske mogućnosti budu dozvoljavale, posebno i jutarnji program Televizije;
- Nastavit ćemo s praksom prijenosa različitih programa i programskih sadržaja uživo;
- Nastavit ćemo saradnju sa svjetskom filmskom industrijom BLITZ na podizanju kvaliteta i kvantiteta filmskog i serijskog programa RTV ZENICA;
- Nastavit ćemo realizaciju manifestacija Zenica Summer Fest i Zenica Adventure, koja su nam, pored toga što obraduju i razvesele stotine hiljada posjetilaca na Trgu i na gradskim ulicama, donijele stotine sati programa iz vlastite produkcije, što je ravno poduhvatu.

Već su poduzeti određeni koraci, u trenutku pripreme ovog Izvještaja o radu i poslovanju, a konkretno se tiču obogaćivanja programskih sadržaja i kvalitativno i kvantitativno, uz podršku i pomoć novih mladih snaga koje smo zaposlili preko programa sufinansiranja zapošljavanja Federalnog zavoda za zapošljavanje. Nažalost, za bilo kakve veće iskorake i kvalitetnije i bolje programske sadržaje, neophodna su dodatna sredstva, na čemu intenzivno radimo i pregovaramo, kako bismo obezbijedili bolje uslove za rad, a samim tim još više unaprijedili naš program i programske sadržaje na sve tri medijske platforme.

O RADU NADZORNOG ODBORA

Nadzorni odbor JP RTV ZENICA čine tri člana: Munib Isaković, predsjednik, Haris Herceg, član i Dino Pašalić, član Nadzornog odbora.

INFORMACIJA O RADU NADZORNOG ODBORA JP RTV ZENICA

Nadzorni odbor Javnog preduzeća RTV ZENICA je svoju funkciju ostvarivao u skadu sa Zakonom o privrednim društvima, Zakonom o javnim preduzećima u FBiH, Statutom i drugim normativnim aktima Društva.

Tokom 2022. godine, Nadzorni odbor održao je ukupno devet sjednica, tokom kojih su razmatrani i usvajani izvještaji o radu i poslovanju, razmatrano finansijsko stanje Društva, kvartalno, ali i svakih mjesedva poslovanja, razmatrano i raspravljano o aktuелnoj problematici. Nadzorni odbor je, zajedno sa Upravom Društva i predstavnicima Sindikata radnika RTV Z iz Zenice radio na najkvalitetnijem rješenju novih pravilnika o sistematizaciji, što je konačno, nakon nekoliko mjeseci pripreme i razrade, krajem novembra mjeseca i usvojeno. Nadzorni odbor je, u skladu sa svojim nadležnostima, davao suglasnost na potpisivanje kompenzacija, te razmatrao i druge akte i dopise koji su dolazili tokom godine na adresu Nadzornog odbora ovog javnog preduzeća.

NADLEŽNOSTI NADZORNOG ODBORA

Nadležnosti Nadzornog odbora, utvrđene su Zakonom i Statutom Javnog preduzeća RTV ZENICA d.o.o. Zenica i to kako slijedi:

- nadzire rad Uprave Društva,
- nadzire poslovanje Društva;
- priprema poslovnike i predlaže ih Skupštini;
- priprema etički kodeks i predlaže ga Skupštini;
- vrši izbor kandidata Odbora za reviziju i podnosi prijedlog za njegovo imenovanje Skupštini;
- razmatra provedbeni propis za postupak nabavki i nadzire njegovo provođenje;
- daje mišljenje skupštini o prijedlogu Uprave za raspodjelu profita;
- predlaže način pokrića gubitka;
- imenuje i razrješava članove Uprave u skladu sa postupcima utvrđenim poslovníkom te važećim propisima;
- daje ovlaštenja za aktivnosti koje su ograničene propisima Zakona o javnim preduzećima;
- daje upute direktoru za provođenje uviđaja u vezi sa uočenim nepravilnostima;
- usvaja izvještaj Uprave o poslovanju po polugodišnjem i godišnjem obračunu, sa bilansom stanja i bilansom uspjeha i izvještajem revizije;
- podnosi skupštini godišnji izvještaj o poslovanju Društva, koji obavezno uključuje izvještaj revizora, izvještaj o radu Nadzornog odbora i odbora za reviziju, i plan poslovanja za narednu poslovnu godinu u okvirima postojećeg plana i revidiranog plana;
- odobrava kupovinu, prodaju, zamjenu, uzimanje u lizing i druge transakcije s imovinom, direktno ili posredstvom supsidijarnih društava u toku poslovne godine u obimu od 15% (petnaest odsto) do 33% (trideset i tri odsto) knjigovodstvene vrijednosti ukupno imovine dioničkog društva;
- nadzire upravu u provođenju preporuka datih od strane Odbora za reviziju te vanjskog revizora sa specificiranim rokovima;
- sistematski nadzor nad poslovanjem i zakonitošću poslovanja Društva;
- redovno izvještavanje skupštine Društva o svom radu;
- davanje instrukcija organima Društva radi otklanjanja nepravilnosti u radu;
- prisustvovanje sjednicama skupštine Društva i učešće u raspravi bez prava glasa;
- pregled poslovnih knjiga i dokumentacije Društva;
- drugi poslovi predviđeni zakonom.

OSTALE AKTIVNOSTI NADZORNOG ODBORA

Ostale aktivnosti Nadzornog odbora sastojale su se u zauzimanju stavova i pružanju podrške Upravi Društva u pogledu stalne potrebe za podizanjem kvaliteta u radu posebno kada je u pitanju proizvodnja vlastitog programa, s ciljem boljeg pozicioniranja na tržištu. Kroz kontinuiranu komunikaciju i saradnju sa Upravom, Nadzorni odbor je nastojao podsticati Upravu da kroz povećanje vlastitih prihoda putem marketinških aktivnosti smanji ovisnost preduzeća o budžetskim izdacima. Nadzorni odbor je bio aktivno uključen u praćenje situacije i iznalaženje rješenja u vezi sa tužbama radnika i presudama protiv JP RTV ZENICA, ali i u iznalaženje novih potencijalnih izvora finansiranja, posebno u saniranju posljedica koronavirusa.

DOPRINOS NADZORNOG ODBORA U OSTVARIVANJU POLITIKE JP RTV ZENICA

U pogledu ostvarivanja politike preduzeća, doprinos Nadzornog odbora ogleda se u sljedećem:

- Osiguranje zakonitosti u poslovanju i radu JP RTV ZENICA d.o.o. Zenica;
- Nadzor nad sprovođenjem Trogodišnjeg plana rada i poslovanja i usvajanje Plana rada i poslovanja za tekuću godinu;
- Saradnja sa Upravom Društva u iznalaženju mogućnosti za jačanjem pozicije sva tri medija u sastavu JP RTV ZENICA d.o.o. Zenica i osposobljavanju za tržišnu utakmicu;

- Kontinuirana saradnja po pitanju iznalaženja mogućnosti prevazilaženja problema nastalih usljed pravosnažnih presuda nakon tužbi zaposlenika protiv JP RTV Zenica;
- Podrška i saradnja sa Upravom u smislu iznalaženja rješenja za adekvatan poslovni prostor na kojem bi bile smještene sve organizacione jedinice i službe JP RTV Zenica, a što bi značajno doprinijelo povećanju kvaliteta rada i poslovanju.

ZAKLJUČNA RAZMATRANJA

Pored aktivnosti na sjednicama Nadzornog odbora, predsjednik i članovi Nadzornog odbora bili su angažovani i na drugim aktivnostima važnim za poslovanje Društva, trudeći se da svojim znanjem i iskustvom doprinesu bržem i lakšem rješavanju pojedinih pitanja.

Saradnja Nadzornog odbora i Uprave Društva bila je kontinuirana i odvijala se bez smetnji, u cilju uspješnog funkcioniranja Društva.

Sve odluke Nadzornog odbora donesene su u skladu sa zakonskim i statutarnim ovlaštenjima i sve su realizovane u predviđenim vremenskim rokovima. Bitno je naglasiti i da su sve odluke Nadzornog odbora donesene jednoglasno i bez isticanja suprostavljenih stavova.

TROGODIŠNJI PLAN POSLOVANJA – 2022. – 2024.

I – OPĆE ODREDBE

Na osnovu člana 22. i 23. Zakona o javnim preduzećima i člana 40. i 67. Statuta JP RTV ZENICA d.o.o. Zenica, Uprava je izradila trogodišnji Plan poslovanja Društva.

Ovaj Plan poslovanja predstavljat će osnov poslovnih aktivnosti Društva za 2022., 2023. i 2024. godinu, u pogledu onih pitanja koja sadrži. Uprava će, u skladu sa Zakonom o javnim preduzećima, na godišnjem osnovu, razmatrati Plan poslovanja, te u slučaju potrebe, a u skladu sa njegovim ciljevima, revidirati i uskladiti Plan poslovanja, radi njegovog prilagođavanja kretanjima na komercijalnom tržištu.

Plan poslovanja za trogodišnji period 2022. – 2024. godina zasnovan je i usklađen sa:

1. Računovodstvenim standardima i drugim zakonskim propisima iz oblasti finansijskog poslovanja;
2. Obavezama RTV ZENICA, koje Društvo ima kao javno preduzeće;
3. Funkcijom i obavezama Televizije Zenica, Radio Zenice i web portala „zenicainfo.ba“, kao javnih medija;
4. Finansijskim obavezama Društva;
5. Pravilima i propisima nadležne Regulatorne agencije za komunikacije;
6. Ekonomskim položajem RTV ZENICA, materijalnim, tehničkim i kadrovskim resursima kojim raspolaže Društvo i realnim mogućnostima razvoja;
7. Realnim procjenama budžetskih izdvajanja Grada Zenica za sufinansiranje RTV ZENICA u periodu 2022. – 2024. godine
8. Analizom i procjenom tržišnih uslova, u kojima će RTV ZENICA, kao lokalni javni medij, poslovati u periodu 2022. – 2024. godine
9. Procesom digitalizacije elektronskih medija

II – PRAVNI STATUS I DJELATNOST

Javno preduzeće RTV ZENICA organizovano je kao društvo sa ograničenom odgovornošću, sa 67,5 odsto državnog i 32,5 odsto privatnog kapitala. Osnivač ovog javnog preduzeća je Grad, odnosno tadašnja Općina Zenica i mali udjeličari. Osnovna djelatnost je proizvodnja, prijenos i emitovanje radijskog i televizijskog programa, namijenjenog javnosti.

RTV ZENICA ima tri medija – Radio, Televiziju i web stranicu „zenicainfo.ba“. Radio Zenica je regionalna javna radio stanica, koja program emituje 24 sata dnevno, putem zemaljskog emitovanja, putem interneta i kablovskih kanala. Potencijalna populacija slušalaca je milion.

Televizija Zenica pokriva područje Zenice i dijelove susjednih općina i/ili gradova, ali je putem kablovskog sistema, dostupna na cijeloj teritoriji Bosne i Hercegovine, odnosno putem interneta program Televizije Zenica može se gledati iz bilo kojeg dijela svijeta. Potencijalna populacija je milion stanovnika.

Desetogodišnje dozvole za rad, izdate od Regulatorne agencije za komunikacije Bosne i Hercegovine, prestale su da važe zaključno sa 31.12.2021. godine. Dozvola za zemaljsko emitovanje radijskog signala je produžena za narednih deset godina, dok je dozvola za emitovanje televizijskog signala putem zemaljske analogne radiofrekventne mreže produžena samo na godinu dana, odnosno do 31.12.2022. godine, a zbog mogućnosti smetnji u digitalnom radiofrekventnom pojasu.

Kao javne RTV stanice, Radio Zenica i TV Zenica imaju tačno utvrđene programske obaveze definisane u Pravilu 57, kodeksima Regulatorne agencije za komunikacije i dozvolama za emitovanje programa.

To prvenstveno znači da i Televizija Zenica i Radio Zenica podliježu posebnim propisima i ograničenjima za emitovanje reklamnih sadržaja i plaćenog oglašavanja.

Najvažniji akti Regulatorne agencije za komunikacije koji regulišu obaveze i pravila za javne RTV stanice su:

- Pravilo 57/2011 o javnim RTV stanicama
- Pravilo 55/2011 o pružanju audiovizuelnih medijskih usluga
- Pravilo 56/2011 o dozvolama za distribuciju audiovizuelnih medijskih usluga i medijskih usluga radija
- Pravilo 58/2011 o pružanju medijskih usluga radija
- Pravilo 71/2013 o Registru korisnika dozvola Regulatorne agencije za komunikacije
- Kodeks o audiovizuelnim medijskim uslugama i medijskim uslugama radija
- Kodeks o komercijalnim komunikacijama

JP RTV ZENICA, kao elektronski medij, obavezna je poštivati i ostala pravila, kodekse i smjernice Regulatorne agencije za komunikacije koji su usklađeni sa

Direktivama Evropske unije o audio-vizuelnim medijskim uslugama. To je obaveza koja proizilazi iz Sporazuma o stabilizaciji i pridruživanju.

Preduzeće je organizovano kao društvo sa ograničenom odgovornošću, koje u svom sastavu, prema aktuelnoj sistematizaciji radnih mjesta, ima sljedeće organizacione cjeline:

- Organizaciona jedinica za proizvodnju programa programa
- Organizaciona jedinica za administrativno-tehničku podršku u radu Uprave

Organi Društva su:

- a) Skupština koju čini svih 20 članova Društva, a većinski vlasnik – Grad Zenica ima 68 glasova
- b) Nadzorni odbor, sastavljen od tri člana –predstavnik Grada Zenica
- c) Uprava koju predstavlja direktor

RTV ZENICA još nema imenovan Odbor za reviziju.

TV Zenica i Radio Zenica emituju programe iz vlastite produkcije, ustupljene i programe iz razmjene sa drugim radio i televizijskim stanicama, emisije nezavisne produkcije i kupljene programske sadržaje. Takođe, Radio Zenica i TV Zenica program ustupaju drugim medijskim kućama ili ih realizuju u koprodukciji sa partnerima. Na taj način, RTV ZENICA informacije iz lokalne zajednice i druge programske sadržaje plasira cijeloj Bosni i Hercegovini i šire. RTV ZENICA preuzima vijesti i emisije Glasa Amerike, Radija Deutsche Welle, Slobodne Evrope i BH Radija 1.

III – STRATEŠKI PLAN PREDUZEĆA

Menadžment Preduzeća, odnosno Uprava Društva, ima jasnu viziju razvoja JP RTV ZENICA, usmjerenog na postizanje osnovnog cilja – kvalitetan, sadržajan i zanimljiv program, u kojem se prioritet daje informativnom programu, lokalnim temama i događajima.

Slušaocima i gledaocima će se pružiti, pored informativnog programa, i edukativni, dječiji, dokumentarni, sportski i zabavni sadržaji, te filmovi i serije.

Radio i Televizija Zenica će, na prostoru koji pokrivaju, još više nego do sada biti mediji bez kojih se ne može. Ovo će se postići realizacijom utvrđenih strateških ciljeva. Imajući u vidu uslove privređivanja u okruženju, ukupna ekonomska kretanja, bez obzira na sva ograničenja koja oni nose, procjene poslovanja RTV ZENICA su pozitivne, pa planiramo takva kretanja u naredne tri godine.

Strateški ciljevi poslovne politike u naredne tri godine bit će:

1. Unapređenje finansijskog poslovanja u smislu povećanja prihoda, kako iz budžetskih sredstava, tako i vlastitih, ostvarenih na tržištu;
2. Realizacija projekta rekonstrukcije i/ili izgradnje RTV doma u Zenici;
3. Prelazak na digitalni sistem emitovanja zemaljskog signala TV programa i tehničko opremanje novog prostora i opreme, u skladu s tim ciljem;
4. Unapređenje programskih sadržaja TV i Radio Zenice, poboljšanje kvaliteta svih programskih segmenata i ispunjavanje zahtjeva javnosti, odnosno građana za poštenim, objektivnim, pravovremenim i izbalansiranim informacijama;
5. Razvijanje web portala kao primarnog medija RTV ZENICA;
6. Nastavak procesa unapređenja organizacije Društva, posebno nakon prelaska u zajednički prostor, u smislu racionalnijeg korištenja postojećih resursa.

IV – POTENCIJALNI RIZICI

Pod rizikom se podrazumjeva bilo koji događaj ili problem koji bi se mogao dogoditi i/ili nepovoljno utjecati na postizanje ciljeva Društva. Shodno tome, treba osigurati identifikaciju najvažnijih, stvarnih i potencijalnih rizika. Uprava Društva je ta koje će izraditi listu rizika i izvršiti procjenu mogućnosti nastanka istog, te i eventualne negativne posljedice za Društvo. Polazeći od toga, a na osnovu sadašnjih saznanja i dosadašnjeg iskustva, Uprava nastoji da nivo rizika kontroliše, a samim tim i preduzima aktivnosti za ublažavanja rizika, kao što su kontrolne aktivnosti. Oblasti koje su dobro kontrolisane obično imaju niže nivoe rizika.

Uprava procjenjuje da Društvo u narednom periodu može biti suočeno sa sljedećim rizicima:

1. Smanjenje budžeta vlastitog prihoda u periodu 2023.-2025. godine uzrokovano COVID pandemijom i drugom višom silom (ratni sukobi ili sl.), što samim tim povlači i smanjenje dotacije budžetskih sredstava;
2. Nelikvidnost koja može otežati, ili znatno umanjiti mogućnost obavljanja planiranih aktivnosti;
3. Nemogućnost naplate i/ili veće kašnjenje s naplatom već pruženih usluga;
4. Kvarovi opreme koja je zastarjela i/ili u potpunosti amortizovana i otpisana;
5. Nemogućnost ispunjavanja obaveza prema javnim prihodima;
6. Nemogućnost obezbjeđenja kreditnih sredstava za kapitalna ulaganja;
7. Zaostajanje u implementaciji novih programskih paketa, emisja i slično;
8. Neadekvatna kvalifikaciona struktura i nedovoljna obučenost zaposlenih za realizaciju planiranih projekata;
9. Negativan utjecaj rada na dvije lokacije, te
10. Nepredviđeni događaji, odnosno viša sila...

Iz gore navedenog, evidentna je neophodna potreba za postojanje Strategije upravljanja rizicima u JP „RTV ZENICA“ d.o.o. Zenica. Pri tome treba uzeti u obzir odredbe važećeg Zakona o finansijskom upravljanju i kontroli u javnom sektoru u FBiH, Pravilnik o provođenju finansijskog upravljanja i kontrole u javnom sektoru u FBiH i odredbe međunarodnih standarda koji se primjenjuju pri finansijskom izvještavanju za subjekte od javnog interesa. Imajući u vidu uslove privređivanja koji vladaju u okruženju, te kretanja na tržištu, programske planove, kao i planove prodaje, za naredne tri godine ipak se očekuje značajniji rast obima poslovanja s općinama Zeničko-dobojskog kantona, ali i samom Vladom i Skupštinom Zeničko-dobojskog kantona.

PLAN ZA 2023.

UVODNE NAPOMENE

Plan prihoda i rashoda za 2022. godinu predložen je prema metodologiji iskazivanja finansijskih podataka koju određuju MRS, MSFI, Zakon o računovodstvu i reviziji, Zakon o javnim preduzećima, Zakon o privrednim društvima, Pravilnik o računovodstvu, kao i pravni akti RTV ZENICE.

Ovim planom, RTV ZENICA mora se pridržavati pravila koja su definisana od strane Regulatorne agencije za komunikacije Bosne i Hercegovine, koja su jasna i obavezna za sve RTV servise u našoj državi.

Također, Zakonom je propisana obavezna revizija finansijskih izvještaja od strane nezavisnih domaćih revizorskih kuća i njihovo izvještavanje o utvrđenom činjeničnom stanju raspolaganja i trošenja sredstava koje RTV ZENICA ostvaruje po osnovu javnih, ali i vlastitih prihoda.

Trajni ciljevi i zadaci su, između ostalih, da organizuje i kontroliše kvalitet rada RTV ZENICE, samim tim i povećanje proizvodnje vlastitog programa, povećanje radnog učinka svih zaposlenika što bi rezultiralo povećanjem vlastitih prihoda, ali i povećanjem podrške od strane osnivača – Grada Zenica.

Za realizaciju svih planiranih aktivnosti i zadataka neophodna su značajnija finansijska sredstva koja se ostvaruju, pored vlastitog prihoda, finansiranjem djelatnosti od strane osnivača.

Prihodi i rashodi za 2023. godinu planirani su na bazi realnih pokazatelja, a kao polazna osnova uzeta su ostvarenja istih u 2022. godini, ali i na bazi predviđenih aktivnosti, sve u skladu sa stvarnim mogućnostima i kapacitetima RTV ZENICE, kao i na bazi drugih planiranih aktivnosti definisanih u Trogodišnjem planu poslovanja i Strateškom planu RTV ZENICE iz 2018. godine.

PLAN PRIHODA

RB	OPIS	Ostvarenje JANUAR - DECEMBAR 2022. godine	PLAN ZA 2023. GODINU	TROGODIŠNJI PLAN ZA 2023.-2025. GODINU	INDEX (4:3)
1	2	3	4	5	6
	A. PRIHODI				
1	Prihod od godišnjih ugovora	66.230	75.000	255.000	1,13
2	Prihod od raznih obavještenja i reklama, razni projekti	245.821	280.000	855.000	1,14
3	Prihod od čestitki	11.210	15.000	50.000	1,34
4	Prihod od usluga tr. licima-prefakturisanje agencijama	12.471	15.000	50.000	1,20
5	Prihod od produkcije- spotovi, džinglovi i sl.	51.386	55.000	180.000	1,07
6	Prihodi od političkog oglašavanja	9.063	0	30.000	0,00
8	Prihod od nemarketinških usluga	4.216	10.000	50.000	2,37
10	Prihodi od koprodukcijских ugovora	26.380	30.000	100.000	1,14
11	Prihodi od vjerskih programa	39.180	50.000	150.000	1,28
12	Prihodi od IOM; ZSF; ZE-ADV vlastiti	44.191	80.000	250.000	1,81
I	PRIHODI OD USLUGA VLASTITE DJELATNOSTI	510.148	610.000	1.970.000	1,20
13	Prihodi od finansiranja Grada Zenica u novčanom obliku	380.000	430.000	1.360.000	1,13
14	Prihodi od finansiranja ostalo	396.000	400.000	1.300.000	1,01
15	Prihodi od finansiranja za razne projekte	6.340	15.000	50.000	2,37
16	Prihodi od subvencija - razvoj emisionog sistema i sl.	50.000	50.000	200.000	1,00

17	Prihodi za adaptaciju	0	100.000	300.000	1,00
II	JAVNI PRIHODI	832.340	995.000	3.210.000	1,20
18	Prihodi od donacija - amortizacioni dio oprema	47.455	36.000	108.000	0,76
19	Prihodi od ukinutih rezervisanja rezervisanja	0	63.000	30.000	1,00
20	Naplaćena otpisana potraživanja	2.474	2.500	10.000	1,01
21	Prihodi od finansiranja zavoda za zapošljavanje	4.334	40.000	80.000	9,23
22	Prihodi – ostali poslovanja	1.201	5.000	20.000	4,16
III	OSTALI POSLOVNI PRIHODI	55.464	146.500	248.000	2,64
	UKUPNI POSLOVNI PRIHOD (I+II)	1.397.952	1.751.500	5.428.000	1,25

PLAN RASHODA

RB	OPIS	Ostvarenje JANUAR- DECEMBAR 2022. godine	PLAN ZA 2023. GODINU	TROGODIŠNJI PLA ZA 2023- 2025. GOD.	INDEX (4:3)
1	2	3	4	5	6
	RASHODI				
1	Troškovi kancelarijskog i potrošnog materijala	7.127	10.000	30.000	1,40
2	Troškovi električne energije	9.287	12.000	36.000	1,29
3	Troškovi grijanja	8.309	10.000	30.000	1,20
4	Troškovi goriva	3.454	6.000	18.000	1,74
5	Troškovi otpisa inventara	3.257	5.000	15.000	1,54
I	MATERIJALNI TROŠKOVI	31.434	43.000	129.000	1,37
6	Troškovi neto plata	378.111	434.828	1.304.483	1,15
7	Porez na dohodak na neto plate	24.921	28.659	85.977	1,15
8	Doprinosi na osnovicu	190.403	218.963	656.890	1,15
9	Doprinosi iz osnovice	64.491	74.165	222.494	1,15
II	TROŠKOVI PLATA	657.926	756.615	2.269.845	1,15
10	Ostala primanja zaposlenih, topli obrok, otpremnine, pomoćim prijevoz i slično	113.611	130.000	390.000	1,14
11	Troškovi po osnovu tužbi radnika za ranije periode	0	0		
III	TROŠKOVI OSTALIH PRIMANJA ZAPOSLENIH	113.611	130.000	390.000	1,14
12	Troškovi NO, bruto	12.653	12.653	40.000	1,00
13	Troškovi naknada po ugovorima	428	5.000	25.000	11,68
IV	TROŠKOVI OSTALIH NAKNADA FIZ. LICIMA	13.081	17.653	65.000	1,35
	TROŠKOVI ZAPOSLENIH I NAKNADE	784.618	904.268	2.724.845	1,15
14	Troškovi održavanja i servisiranja	11.498	15.000	45.000	1,30
15	Troškovi zakupa	14.231	15.000	45.000	1,05
16	Troškovi zakupa ostalo	160	400	1.200	2,50
17	Advokatske usluge, notarske, knjigovodstvene	18.768	10.000	30.000	0,53
18	Agencijske usluge i posredovanje	1.815	2.500	7.500	1,38
19	Komunalne i slične usluge	2.507	3.000	9.000	1,20
20	Troškovi reprezentacije	928	6.000	18.000	6,47

21	Smještaj učesnika u manif. I ugost. Usluge partnerima	4.916	6.000	18.000	1,22
22	Osiguranje opreme i registracije auta	4.848	5.000	15.000	1,03
23	Troškovi platnog prometa	3.825	4.500	13.500	1,18
24	PTT, Telefonske, Telemach i slično	17.756	20.000	60.000	1,13
25	KN, vatrogastvo, i slične takse	7.495	10.000	30.000	1,33
26	Naknada za CRA dozvole	9.317	10.000	30.000	1,07
27	Naknade za autorska prava AMUS, AIS, FONOGRAM	14.829	15.000	45.000	1,01
28	Troškovi otkupa programa	0	150.000	450.000	1,00
29	Troškovi koprodukcije	46.847	100.000	300.000	2,13
30	Zavisni troškovi koprodukcije	56.555	60.000	180.000	1,06
31	Troškovi članarina, razni doprinosi i slično	1.187	2.000	6.000	1,68
32	Troškovi amortizacije	229.635	235.000	705.000	1,02
33	Troškovi štampe, kopiranje i uvezanih materijala	16.537	20.000	60.000	1,21
34	Zaštitna oprema viziri, maske, rukavice, odjeća	503	2.000	6.000	3,98
35	Dezinfekciona sredstva	409	1.000	3.000	2,44
36	Materijal za projekat IOM i naknade	0	25.000	75.000	1,00
37	Ostali troškovi poslovanja	2.650	6.000	18.000	2,26
38	Troškovi rezervisanja, tužbe i otpremnine	63.000	10.000	30.000	0,16
39	Troškovi seminara	1.780	4.000	12.000	2,25
40	Troškovi kamata, najmovi, tužbe i ostale kamate	9.174	6.000	18.000	0,65
41	Otpisi potraživanja i slično	12.650	2.500	7.500	0,20
V	SVEGA RAZNI TROŠKOVI POSLOVANJA	553.820	745.900	2.237.700	1,35
	UKUPNI POSLOVNI RASHODI	1.369.872	1.693.168	5.079.504	1,24
	UKUPNI POSLOVNI PRIHODI	1.397.952	1.751.500	5.254.500	1,25
	POSLOVNI REZULTAT	28.080	58.332	174.996	2,08

PLAN NABAVKI

U skladu sa Zakonom o javnim nabavkama Bosne i Hercegovine („Službeni glasnik BiH”, br. 39/14) i Zakonu o izmjenama i dopunama Zakona o javnim nabavkama („Službeni glasnik BiH”, br. 59/22) — (u daljem tekstu Zakon), izrađen je Privremeni plan nabavki za 2023. godinu po predmetima javnih nabavki. Planom nabavki za 2023. godinu utvrđuju se predmeti nabavke, vrste postupaka provođenja nabavki, podjela na lotove (da/ne), vrsta ugovora (robe/usluge/radovi), ugovor o javnoj nabavci ili okvirni sporazum, period trajanja ugovora ili okvirnog sporazuma, procijenjenu vrijednost nabavke, okvirni datum pokretanja postupka. Plan, a u skladu sa zakonskim odredbama, sadrži oznaku JRJN i naziv predmeta nabavke iz JRJN. Privremeni plan nabavki objavljen je na portalu Agencije za javne nabavke 31.01.2023. godine, s napomenom da se radi o Privremenom planu nabavki, a period važenja je 31.05.2023. godine do kada se mora objaviti konačan Plan javnih nabavki.

Zakon o javnim nabavkama BiH prepoznaje sedam različitih postupaka:

- otvoreni postupak;
- ograničeni postupak;
- pregovarački postupak sa objavom obavještenja;
- pregovarački postupak bez objave obavještenja;
- takmičarski dijalog;
- konkurentski zahtjev za dostavu ponuda; i
- direktni sporazum

Otvoreni i ograničeni postupak su osnovni i redovni postupci, pregovarački postupak i takmičarski dijalog su izuzeci uz ispunjavanje određenih uslova, dok su konkurentski zahtjev za dostavu ponuda i direktni sporazum postupci koji se koriste za nabavke manjih vrijednosti.

Otvoreni postupak je postupak u kojem svaki zainteresirani ponuđač, koji ispunjava uslove lične, ekonomske i finansijske sposobnosti, može dostaviti ponudu.

Ograničeni postupak je postupak u dvije faze u kojem privredni subjekt, na osnovu obavještenja o nabavci, može zahtijevati učešće, a nakon obavljene kvalifikacije ugovorni organ poziva sve kvalificirane kandidate da podnesu ponude.

Pregovarački postupak je postupak u kojem ugovorni organ pregovara o uslovima ugovora s jednim ili više pozvanih ponuđača. Pregovarački postupak može biti sa objavom obavještenja ili bez objave obavještenja na osnovu uslova koji su navedeni u Zakonu.

Takmičarski dijalog je postupak u kojem svaki zainteresirani privredni subjekt može zatražiti da učestvuje u postupku, pri čemu ugovorni organ s učesnicima pozvanim u taj postupak vodi dijalog s ciljem razvijanja jednog ili više odgovarajućih rješenja koja mogu ispuniti njegove zahtjeve i na osnovu kojih su izabrani ponuđači pozvani da podnesu ponude.

Konkurentski zahtjev za dostavu ponuda se može koristiti ukoliko je procijenjena nabavka robe ili usluge manja od 50.000,00 KM, a u slučaju radova manja od 80.000,00 KM. U ovom postupku ugovorni organ upućuje zahtjev za dostavu ponuda određenom broju ponuđača (najmanje tri) i objavljuje obavještenje o nabavci na portalu javnih nabavki.

Direktni sporazum se koristi ukoliko je vrijednost nabavke procijenjena na iznos od 6.000,00 KM ili manje, odnosno, prema Zakonu o izmjenama i dopunama Zakona o javnim nabavkama i do 10.000,00 KM. Ugovorni organ nakon ispitivanja tržišta traži pismeno prijedlog cijene ili ponudu od jednog ili više ponuđača i pregovara ili prihvata cijenu, na osnovu čega se zaključuje ugovor.

Zakon o javnim nabavkama ne dopušta ugovornim organima da dijele predmet nabavke na više postupaka s namjerom izbjegavanja primjene odgovarajućeg postupka (npr. kupovina istog predmeta nabavke kroz više direktnih sporazuma kako bi se izbjeglo korištenje otvorenog postupka). S obzirom da je svaki ugovorni organ dužan da u roku od 60 dana od usvajanja budžeta objavi plan nabavki, tj. dokument u kojem su navedene sve planirane nabavke u budžetskoj godini, nabavka veće količine istog predmeta nabavke se blagovremeno planira pod istim postupkom.

Izuzetak predstavlja mogućnost da se u okviru istog postupka izvrši podjela na lotove. Lot (ili grupa) je dio predmeta nabavke nastao kao rezultat dijeljenja predmeta nabavke u posebne, srodne cjeline, koje se kao takve označavaju u tenderskoj dokumentaciji. Ponuđači mogu dati ponudu za jedan lot ili više lotova ili za sve lotove. Podjela na lotove ima za cilj da se osigura maksimalna konkurencija i da se smanje troškovi postupka. Veoma je bitno da predmeti unutar lota budu što sličniji, homogeni i da pripadaju istoj skupini (npr. kompjuteri i laptopi; a ne kompjuteri i klima uređaji).

Ukupna planirana vrijednost Privremenog plana javnih nabavki u 2023. godini iznosi 739.700,00 KM:

Redni broj	Vrsta postupka	Vrijednosni pokazatelji
1.	Javne nabavke roba i usluga bez PDV-a	739.700,00 KM
2.	Okvirna vrijednost s PDV-om	1.111.180,00 KM

IZVOD IZ IZVJEŠTAJA REVIZORA



Revizija Revita d.o.o.
Generala Izeta Nanića bb
77220 Cazin
Bosna i Hercegovina
MBS: 1-4786-00
ID br.: 4263012380009
PDV br.: 263012380009

Tel: + 387 37 513 772
Tel: + 387 37 539 018
Fax: + 387 37 513 772
email: info@revizijarevita.com
www.revizijarevita.com

Banka: UniCredit Bank d.d.
Kardinala Stepinca bb
88000 Mostar
Bosna i Hercegovina
Žiro račun: 3385202206476757
IBAN: BA393385204806658272
SWIFT: UNCRBA22
Banka: ASA Banka d.d.
Trg Međunarodnog prijateljstva 25
71000 Sarajevo
Bosna i Hercegovina
Žiro račun: 1344901000372714

Izveštaj neovisnog revizora

Vlasnicima društva Javno poduzeće Radio televizija Zenica d.o.o. Zenica

Mišljenje s rezervom

Obavili smo reviziju finansijskih izvještaja društva Javno poduzeće Radio televizija Zenica d.o.o. Zenica („Društvo“), koji obuhvaćaju izvještaj o finansijskom položaju na 31. decembar 2022. godine, izvještaj o sveobuhvatnoj dobiti za tada završenu godinu, te bilješke uz finansijske izvještaje, uključujući i sažetak značajnih računovodstvenih politika (izmijenjeno).

Prema našem mišljenju, osim za učinke i moguće učinke pitanja u dijelu „Osnova za mišljenje s rezervom“, priloženi finansijski izvještaji fer prezentiraju, u svim značajnim odrednicama, finansijski položaj Društva na 31. decembar 2022. godine i njegovu finansijsku uspješnost za tada završenu godinu u skladu s Međunarodnim standardima finansijskog izvještavanja („MSFI-ima“).

Osnova za mišljenje s rezervom

Kao što je iskazano u izvještaju o finansijskom položaju na dan 31. decembra 2022. godine Društvo ima evidentiranu dugoročnu imovinu u iznosu od 822.891 KM (31. decembra 2021. godine: 724.745 KM). Društvo je dugoročnu imovinu klasificiralo kao nekretnine, postrojenja i opremu u iznosu od 202.470 KM (31. decembra 2021. godine: 245.263 KM) i kao nematerijalnu imovinu u iznosu od 616.333 KM (31. decembra 2021. godine: 476.997 KM). Osim toga, iskazani su odgođeni prihodi u iznosu od 197.957 KM (31. decembra 2021. godine: 255.480 KM). Društvo nad nekretninama prikazanim kao nekretnine, postrojenja i oprema i nematerijalna imovina nema u cijelosti regulirano vlasništvo upisom u zemljišnim knjigama, niti smo se mogli uvjeriti da je rješavanje imovinsko – pravnih pitanja u toku. Osim toga, nismo se uspjeli uvjeriti u tačnost klasifikacije stavki u skladu s zahtjevima Međunarodnih standarda finansijskog izvještavanja, posebno u dijelu evidentiranja nekretnina. S obzirom na to da se ovdje radi o kompleksnim pitanjima za koje je potrebno u njihovom rješavanju uključiti osnivača Društva, nismo uspjeli pribaviti dostatne i primjerene revizijske dokaze kako bi se uvjerali u tačnost iskazivanja ove imovine. Temeljem navedenog nismo mogli utvrditi jesu li, i u kojem iznosu, potrebna usklađenja u vezi s nekretninama postrojenjem i opremom i nematerijalnom imovinom za godinu završenu 31. decembra 2022. godine.

Obavili smo našu reviziju u skladu s Međunarodnim revizijskim standardima („MRevS-ima“). Naše odgovornosti prema tim standardima su detaljnije opisane u našem izvještaju u *dijelu o revizorovim odgovornostima za reviziju finansijskih izvještaja*. Neovisni smo od Društva u skladu s Kodeksom etike za profesionalne računovođe („IESBA Kodeks“) i ispunili smo naše ostale etičke odgovornosti u skladu s IESBA Kodeksom.

Vjerujemo da su revizijski dokazi koje smo dobili dostatni i primjereni da osiguraju osnovu za naše mišljenje s rezervom.

Ostala pitanja

Finansijske izvještaje Društva za godinu završenu 31. decembra 2021. godine revidirao je drugi revizor koji je 18. aprila 2022. godine izrazio nemodificirano mišljenje o tim finansijskim izvještajima.



Izveštaj neovisnog revizora (nastavak)

Ostale informacije

Uprava je odgovorna za ostale informacije. Ostale informacije sadrže informacije uključene u godišnji izvještaj poput Godišnjeg izvještaja o poslovanju i Izvještaja o radu, ali ne uključuje financijske izvještaje i naš izvještaj neovisnog revizora o njima. Očekuje se da će nam Izvještaj o radu biti na raspolaganju nakon datuma izvještaja revizora.

Naše mišljenje o financijskim izvještajima ne obuhvata ostale informacije i mi ne izražavamo bilo koji oblik zaključka s izražavanjem uvjerenja o njima. U vezi s našom revizijom financijskih izvještaja, naša je odgovornost pročitati gore navedene ostale informacije, i u provođenju toga, razmotriti jesu li ostale informacije značajno proturječne financijskim izvještajima ili našim saznanjima stečenim u reviziji ili se drugačije čini da su značajno pogrešno prikazane.

U pogledu Godišnjeg izvještaja o poslovanju pregledali smo da li Godišnji izvještaj o poslovanju sadrži objave propisane odredbama Zakona o računovodstvu i reviziji u Federaciji BiH. Ti postupci uključuju provjeru da li Godišnji izvještaj o poslovanju uključuje potrebne objave navedene u članu 42. Zakona o računovodstvu i reviziji. Temeljem provedenih postupaka tokom naše revizije, u mjeri u kojoj smo bili u mogućnosti to procijeniti izvještavamo sljedeće:

- Godišnji izvještaj o poslovanju Društva za 2022. godinu, pripremljen je, u svim značajnim odrednicama, u skladu s članom 42. Zakona o računovodstvu i reviziji u Federaciji BiH.

Osim za učinke i moguće učinke pitanja opisanog u dijelu „*Osnova za mišljenje s rezervom*“, na temelju poznavanja i razumijevanja poslovanja Društva i njegovog okruženja stečenog u okviru revizije financijskih izvještaja, nismo ustanovili značajne pogrešne prikaze u ostalim informacijama.

Odgovornosti Uprave i onih koji su zaduženi za upravljanje za financijske izvještaje

Uprava je odgovorna za sastavljanje financijskih izvještaja koji daju istinit i fer prikaz u skladu s MSFI-ima, i za one interne kontrole za koje Uprava odredi da su potrebne za omogućavanje sastavljanja financijskih izvještaja koji su bez značajnog pogrešnog prikaza uslijed prijevare ili pogreške. U sastavljanju financijskih izvještaja, Uprava je odgovorna za procjenjivanje sposobnosti Društva da nastavi s vremenski neograničenim poslovanjem, objavljivanje, ako je primjenjivo, pitanja povezanih s vremenski neograničenim poslovanjem i korištenjem računovodstvene osnove utemeljene na vremenskoj neograničenosti poslovanja, osim ako Uprava ili namjerava likvidirati Društvo ili prekinuti poslovanje ili nema realne alternative nego da to učini.

Oni koji su zaduženi za upravljanje su odgovorni za nadziranje procesa financijskog izvještavanja kojeg je ustanovilo Društvo.



Izveštaj neovisnog revizora (nastavak)

Odgovornosti revizora za reviziju financijskih izvještaja

Naši ciljevi su steći razumno uvjerenje o tome jesu li financijski izvještaji kao cjelina bez značajnog pogrešnog prikaza uslijed prijevare ili pogreške i izdati izvještaj neovisnog revizora koji uključuje naše mišljenje. Razumno uvjerenje je visoka razina uvjerenja, ali nije garancija da će revizija obavljena u skladu s MRevS-ima uvijek otkriti značajno pogrešno prikazivanje kada ono postoji. Pogrešni prikazi mogu nastati uslijed prijevare ili pogreške i smatraju se značajni ako se razumno može očekivati da, pojedinačno ili skupno, utječu na ekonomske odluke korisnika donijete na osnovi tih financijskih izvještaja.

Kao sastavni dio revizije u skladu s MRevS-ima, stvaramo profesionalne prosudbe i održavamo profesionalni skepticizam tokom revizije. Mi također:

- Prepoznavamo i procjenjujemo rizike značajnog pogrešnog prikaza financijskih izvještaja, zbog prijevare ili pogreške, oblikujemo i obavljamo revizijske postupke kao reakciju na te rizike i pribavljamo revizijske dokaze koji su dostatni i primjereni da osiguraju osnovu za naše mišljenje. Rizik neotkrivanja značajnog pogrešnog prikaza nastalog uslijed prijevare je veći od rizika nastalog uslijed pogreške, jer prijevaramo može uključiti tajne sporazume, krivotvorenje, namjerno ispuštanje, pogrešno prikazivanje ili zaobilaženje internih kontrola.
- Stječemo razumijevanje internih kontrola relevantnih za reviziju kako bismo oblikovali revizijske postupke koji su primjereni u danim okolnostima, ali ne i za svrhu izražavanja mišljenja o učinkovitosti internih kontrola Društva.
- Ocjenjujemo primjerenost korištenih računovodstvenih politika i razumnost računovodstvenih procjena i povezanih objava koje je stvorila Uprava.
- Zaključujemo o primjerenosti korištene računovodstvene osnove utemeljene na vremenskoj neograničenosti poslovanja koju koristi Uprava i, temeljeno na pribavljenim revizijskim dokazima, zaključujemo o tome postoji li značajna neizvjesnost u vezi s događajima ili okolnostima koji mogu stvarati značajnu sumnju u sposobnost Društva da nastavi s vremenski neograničenim poslovanjem. Ako zaključimo da postoji značajna neizvjesnost, od nas se zahtijeva da skrenemo pažnju u našem izvještaju neovisnog revizora na povezane objave u financijskim izvještajima ili, ako takve objave nisu odgovarajuće, da modificiramo naše mišljenje. Naši zaključci se temelje na revizijskim dokazima pribavljenim sve do datuma našeg izvještaja neovisnog revizora. Međutim, budući događaji ili uslovi mogu uzrokovati da Društvo ne bude u mogućnosti nastaviti s vremenski neograničenim poslovanjem.
- Ocjenjujemo cjelokupnu prezentaciju, strukturu i sadržaj financijskih izvještaja, uključujući i objave, kao i odražavaju li financijski izvještaji transakcije i događaje na kojima su zasnovani na način kojim se postiže fer prezentacija.

**Izveštaj neovisnog revizora (nastavak)****Odgovornosti revizora za reviziju finansijskih izvještaja (nastavak)**

Mi komuniciramo s onima koji su zaduženi za upravljanje u vezi s, između ostalih pitanja, planiranim djelokrugom i vremenskim rasporedom revizije i važnim revizijskim nalazima, uključujući i onima u vezi sa značajnim nedostacima u internim kontrolama koji su otkriveni tokom naše revizije.

Dženita Bećiragić

Dženita Bećiragić

Direktor i ovlašteni revizor

Revizija Revita d.o.o. Caz
Generala Izeta Nanića bb,
Cazin, Bosna i Hercegovina



26. aprila 2023. godine

ZAKLJUČAK

Protekla, 2022. godina, bila je izuzetno izazovna, na sreću ne u zdravstvenom smislu kao 2020. – pandemijska godina, ali u ekonomsko-finansijskom smislu jako teška za poslovanje, a s obzirom na masovna poskupljenja na globalnom nivou. Shodno tome, kao društveno odgovorna kompanija, nastojali smo, barem minimalno, povećati primanja naših zaposlenika, kako bismo, koliko-toliko, ublažili posljedice masovnih poskupljenja životnog standarda, iako je to, uz veoma mala izdvajanja sufinansiranja djelatnosti RTV ZENICA iz gradskog budžeta i nikakva izdvajanja sufinansiranja sa viših nivoa vlasti, bilo gotovo nemoguće.

Paralelno sa agonijom sa trenutnim svjetskim trendom globalnom poskupljenja svih troškova poslovanja, radili smo kontinuirano na poboljšanju naših usluga i ispunjavanju naše glavne misije – pravovremeno, istinito i objektivno informisanje.

Po prvi put smo dobili „mišljenje s rezervom“ Nezavisnog revizora zbog, kako u izvještaju stoji, neriješenih imovinsko-pravnih odnosa nad nekretninama koje su nam ustupljene na korištenje od Grada Zenica prije 23 godine, odnosno zbog korištenja službenih prostorija na obje lokacije bez odluke ili ugovora nad nekretninama.

Bitno je napomenuti da je i u revizorskom izvještaju za godinu ranije, za 2021. godinu, koji je radila Nezavisna revizorska kuća Džaferović, također u napomenama i preporukama stajalo da se ovaj problem imovinsko-pravnih odnosa, odnosno pravo korištenja službenih prostorija mora riješiti, ali to nije utjecalo na „pozitivno mišljenje“, jer ovaj problem nije u nadležnosti Uprave, nego isključivo Osnivača.

S obzirom na to da smo sve ostale preporuke ispoštovali i izvršili korekcije u skladu sa preporukama revizora, a i nakon toga nismo dobili „pozitivno mišljenje“, obratili smo se prof. dr. Ismetu Kaliću, direktoru Visoke škole za finansije i računovodstvo, inače i sam nezavisni i forenzički revizor, koji nam je skrenuo pažnju da je „naš slučaj takav, da se neće riješiti ni u narednih nekoliko godina“, i dodao da „Revizija ne može uslovljavati rješavanje tog nerješivog problema, kako bi dala pozitivno revizorsko mišljenje. Ne znam o kojoj se Revizorskoj kući radi, ali očito da nisu korektni niti profesionalni u svom poslu“, napisao je prof. Kalić.

Bez obzira na sve navedeno, Uprava Društva će, uvažavajući preporuke revizora, ali i njegove razloge za „mišljenje s rezervom“, nastojati da do kraja tekuće godine otkloni sve prepreke i omogući da se nekretnine koje koristi ubuduće mogu knjižiti po Međunarodnim računovodstvenim standardima.

JAVNO PREDUZEĆE RADIO-TELEVIZIJA ZENICA je, u ovom izvještajnom periodu, što i jeste najvažnijem ostvarila pozitivan rezultat poslovanja i iskazala dobit u iznosu od 28.079,86 KM.

Realizacija modernizacije tehnoloških kapaciteta Radija i Televizije ne teče planiranom dinamikom. Iako je završetak bio planiran za kraj 2021. godine, bez agresivnijeg uključivanja i podrške Grada Zenica, ovo javno preduzeće neće biti u mogućnosti ispratiti sve planirane investicije i aktivnosti.

Vlastiti prihodi od raznih realizovanih projekata tokom 2022. godine, koji su slijed uvođenja novih kreativnih i drugih djelatnosti, kao odgovor na nedostatak sredstava i finansijskih prihoda iz osnovne djelatnosti Preduzeća, od kojih je najznačajniji saradnja sa Međunarodnim organizacijama IOM i USAID, svakako su uveliko utjecali na konačni ishod poslovnog rezultata.

Plan poslovanja za 2023. godinu sačinjen je optimistično i u duhu pozitivne poslovne atmosfere i uslova poslovanja. Međutim, ukoliko se planira realizacija i ostvarenje svih zacrtanih ciljeva, koji podrazumijevaju izgradnju modernog rtv doma, ali i tehničko-tehnološko opremanje, mora se razmišljati o novijim i drugim, alternativnim, izvorima i prihodima, ali i svakako o povećanju budžetske stavke izdvajanja sredstava za redovno finansiranje proizvodnje programa od strane Osnivača.